

淮海英靈集

二









淮海英靈集

二

阮元輯



中華書局



淮海英靈集

宗元

字子發。其先興化人。祖名世。住江都宜陵鎮之東原。遂爲江都人。元儼與觀。元鼎。皆名世之孫。元豫父

事。聲譽。深於古文。出入歐曾之間。所著。有史論。識小錄。詩文集。共若干卷。

吳子樸北遊

留君不可住。惜別強登樓。塞上征鴻動。淮南落木秋。黃河看曉渡。明月照孤舟。想到金臺畔。應添弔古愁。

早春送李季子南遊

千里征帆繫柳陰。一尊高閣共披襟。雲山正好來新句。春月初明別故林。去路清風聽畫角。懷人永夜奏青琴。江南到日梅花放。珍重歸鴻寄好音。

宗

觀字民表。號鶴間。江都人。以江寧籍。中康熙壬午。觀榜。官貴池教諭。遷常熟。工詩。與從弟元鼎。同爲王阮亭所稱賞。郡志言鶴間。詞苑錄。觀偶。在王孟章柳之間。惜未見其全集也。

龍華寺

省舫出畫溪。筇輿入山腹。數里越翠濤。煙雲時換目。到寺未知門。洞口丹崖複。一逕轉深窈。長松滌萬綠。樹樹吐梅花。芬霏散寒玉。平疇一坦步。流泉聲斷續。雲日冠澄鮮。葱蒨淨如沐。香積引山溜。竹筒激噴瀑。方就筇蕨肥。夕陽苦相促。攜取白雲歸。揮手謝高躅。

大梁

馬上黃河夕照明。綠楊如畫擁新城。月荒梁苑停車路。酒醒關門擊柝聲。遠控豫燕開幕府。安流汴蔡慨東京。銀箏金甲都銷歇。彈指桑田又可耕。

越城

越山綿亘壁雲根。嵐翠溪煙自一村。蘆荻秋寒詞客夢。薜蘿春弔美人魂。羣峰突兀開秦望。霽日蒼茫辨海門。我欲往探青玉字。鷗鵠聲裏夕陽溫。

康山

檜老三間屋。鄒枚昔竝登。舊遊催急景。新築最高層。霞氣截山雨。秋蟲亂樹燈。六朝煙水外。危檻幾回凭。

宗元鼎

字定九。號梅岑。別號小香居士。江都人。居東鄉宜陵鎮之東原。爲阮亭門人。故詩以才調爲主。吳蘭次題其居爲大容別業。七言詩。如來逢驚語詩從作。去後人留酒重醺。雙柑香減佳人手。半臂寒添酒客眉。極爲阮亭所賞。載入漁洋詩話。阮亭每謂其詩風華婉媚。自成一家。所著有夫容齋詩集。新柳堂詩集。

擬劉孝威遇織人寄婦詩

驅車出郭遊。遙望東南樓。中有傾城豔。織緯含怨羞。朝織紅芙蓉。晚織雙飛龍。霞光孔雀舞。芝草卿雲封。停梭有所思。羅袂輕風吹。纖手理裙帶。孤坐翠蛾眉。執杼細徘徊。芳齡慕上才。斷取機中素。寄與良人開。良人年幾何。婷婷三五多。贈我明月珠。貽我雙綺羅。故情不忍忘。故人空守牀。豈以茱萸烈。棄捐蘭蕙芳。

莫作白頭吟。常理綠綺琴。身是他鄉身。心是他鄉心。區區抱眞亮。艷冶不復情。歸來南陌上。不戲秋胡金。雨後

暑退易爲雨。孤村爽氣高。野蠶枯細繭。庭樹落殘桃。碧潤秋三徑。涼添水半篙。江鷗應笑我。歲歲偃林臯。懷周櫟園先生

舊日何郎閣。猶開玉樹枝。情深初不覺。別後始長思。離緒輕千里。春風又一時。美人明月下。都唱竹枝詞。夏日同金耳中黃仙裳諸駿男泛舟限山字

五月城溪足往還。乘船同放小橋灣。一雙楚鳥下空水。萬疊夏雲沈遠山。白雪調高才子曲。紅蓮香勝美人鬟。他年別夢兼葭外。回首風流未易攀。

冬日過甘泉驛

記得常年來古邑。馬鞭帶雪繫樓前。雙柑香濺佳人手。半臂寒添酒客肩。忽見荒堤摧暮草。空傷衰樹沒寒煙。風塵滿目深惆悵。卻望誰家寄醉眠。

過山中

東風吹雨度香芸。遠近煙嵐曉未分。一徑濃桑沈碧影。半溪流澗水盪輕紋。來逢鶯語詩從作。去被人留酒半醺。自笑年來塵事縛。羨他老圃說耕耘。

遣悶

簾捲東風寒食天。綠陰紅雨隔輕煙。春來情緒宜多病。眼底流光亦可憐。總是茶香耽永日。一從詩好度經年。誰知憑仗銷愁處。翻引愁心逐逝川。

寄阮亭先生

淮南風景幾人知。好是清明細雨時。酒冷香殘腰帶減。詩狂他日想王維。休從白傅歌楊柳。莫向劉郎演竹枝。五日東風十日雨。江樓齊唱冶春詞。

雨中留鄒麗農

新開蘭蕙正芳菲。初到鰣魚入饌肥。正是三春好時節。如何拋卻渡江歸。

古意

沈沈煙柳汴河邊。行到郵亭兩岸蟬。當日征人含淚語。分明爲約只三年。

對絳桃有感

曾記江頭醉買春。七年珍重絳桃身。誰知今日花閒酒。不見當年種樹人。

楊

潛字匯甫。江都人。康熙乙酉南巡。以獻賦取入纂修館。康熙辛卯。舉順天鄉試。壬辰。賜進士。改庶吉士。授翰林院檢討。博聞強記。工詩文。卒於官。

曹棟亭銀臺招遊近郊。

草腳青回柳線長。春風一路綠雲香。新詩題徧青山曲。收拾閒情付錦囊。
郭外雲山面而佳。綠楊低護酒人家。風前別有雄心在。閒攬雕弓射落花。

孫閱達

字天士。通州人。康熙甲辰進士。通理。任山西太原縣知縣。有惠政。沒崇祀鄉賢祠。著通雅詩稿。

冬日答陸稼書見懷次韻

一代儒宗推瑩下。空來北地覓津梁。時當力學官爲隱。性不趨炎暑自涼。樂在孔顏今日事。道傳伊洛古人光。頻年未得同心語。轉眼春風看綠楊。

寄魏環溪尙書

聖主千秋遇。幾人能報之。大臣行直道。君子頌良時。白簡天應鑒。青編世不疑。好持冰玉節。耿耿寸心知。

黎

號礪菴。興化人。康熙甲辰進士。

揚子江

一水橫天塹。洪濤萬里來。地分三楚出。山自五州開。風雨鼉鼉起。雲霞日月迴。魏文曾望幸。南北思遐哉。

黎

號從甫。興化。歲貢生。

雨後步藥翁精舍

白水環蕭寺。紅霞散晚天。舉頭剛得月。入樹喜聞蟬。僧偈雨花地。客心鐘磬邊。蒲團閒打坐。何似老青氈。

殷

字桐高，號畫村，高郵人。康熙庚戌進士，鼎季子也。生長高郵，寄籍天長。丙寅拔貢，中丁酉副榜。任太原本令，案無留贖，免官歸。評孫尚銓尚錄等，皆成名諸生。卒年八十三。素工詩，所著有樊桐詩鈔。

月夜懷石梁故人

竟夜清如許，孤吟亦自豪。生平幾兩屐，歲月一綈袍。落葉如人靜，隣鐘出寺高。所思張仲蔚，何處掩蓬蒿。

天津曉發

露氣白千里，馬頭方向西。沙平還沒轍，村近不聞雞。朝日背人出，荒煙垂樹低。提筐爭入市，新熟紫消梨。

齊河縣

連日山行惡，透迤卽路平。過橋當野市，沽酒出荒城。藟蘗編籬種，萍蹤得雨生。愚民無飾說，稱道長官清。

登榆林城樓

一線界華戎，軍牙鉅鎮雄。河環大磧北，城抵受降東。雪印封駝跡，風鳴射虎弓。何時遺憾在，韓范使無功。

隱峰菴

坡陀西去折回南，不過深林不見菴。一半屋依山作壁，兩三僧與佛同龕。種來茶子今年大，管徧新泉此地甘。猶歎未除文字障，棲心何日向伽藍。

真州道中

桃花夾路亞肩輿，地入平寬竹木疎。柳樹颺風初繫馬，草堂經雨自生魚。清明幾日種開甲，煙水一區人

荷鋤蠶事漸興農事急故山回首正沮洳

李蒼存以過京口不得晤有詩見懷次韻卻寄

六朝山色映斜曛聞道扁舟渡水雲蠟屐爲尋焦處士投詩應弔郭參軍
蘆中窮士惟彈劍江上生涯只賣文多少舊遊書問絕贈言珍重孰如君

晉陽宮

粉香填滿玉鉤斜還取離宮貯麗華巫峽信高偏有夢江都雖好已無家
平川牧笛吹楊柳白日游絲罥李花等是興亡歸蔓草夕陽搔首一長嗟

田

登名字梅岑江都人康熙間演黔逆變從祖將軍南征駐湖湘者數年其詩多沈雄矯矯之音與黃岡杜于皇齊
過雪公明沙路淨雨歇稻花香雨夜云雲冷窗侵雨開荒蠶引蟲斗門鎮云破扉猶入燕老樹自開花秋杪
行秋涼孤城上夕曛春日懷人云峯翠猶含雨江聲欲上潮何皆可摘錄

入大峰山

一徑入蒼翠羣峰下馬登草薶眠虎地壁老挂猿藤巖壑時聞磬塵懷不到僧風塵吾老矣欲住更何能

江州詞

菱葉青青葦葉黃人家東去接橫塘探菱渡口風波急駕慣輕舸是女郎

稻穫農閒犢子肥。西風水落釣魚磯。夜深鐙火柴門亂。丫髻兒童照蟹歸。

山閣獨坐望南郭諸山懷陳三壇

曉日登高閣。遐睎郡南山。南山秋自佳。悠然不可攀。中有素心人。抱書清晝間。朝見飛鳥出。暮見飛鳥還。乙卯冬日石城喜晤儼若。

夜行

一片石城月。清光此夜同。地荒多野燒。筋急少歸鴻。人覺別來老。詩看窮後工。十年茅屋意。今日話難終。舟師暗相喚。行子各登航。有虎知山險。無雞覺夜荒。月斜孤鳥磬。笠重滿天霜。此際鄉思切。煙中辨渺茫。途中晤故鄉周子

舊路旗亭那可過。神州翻不似淖沱。地經戰後人逢少。江入秋聲夜聽多。白首對君心更熱。青燈照我飲還歌。三年消息空惆悵。獨立南樓望曉河。

寄懷蔣前民

我友蕪城客。騎驢忽入林。閉門常不飽。種竹已成陰。萬事餘高枕。衰年只苦吟。春風朝夕望。愁絕海雲深。長安秋日送祝亮臣歸青山草堂。

碧天隱隱雁南飛。樽酒河橋對夕暉。醉裏不知家更遠。秋來又送客先歸。黃金臺畔葉初落。白紵山前橘

正肥。自愧餘生仍浪跡。何年一棹叩君扉。

初歸有感

廿年烽火動江關。湖海歸來始覺閒。檻外青山依舊在。階前海鶴幾時還。凋零親串低回問。狼藉詩篇次第刪。獨愛仲容能解事。一檣朝夕破愁顏。

寄懷儼若江右

雨洗征塵靜。花飛野戍空。人間無客路。天上有歸鴻。芳草愁眉外。春江野望中。相思似潮汐。日到小孤東。過訪傳育菴明府

政成無一事。清淨對琴尊。水鳥上庭樹。溪流抱郭門。俸多分客慣。詩獨許吾論。醉裏仍攜手。磨崖碑共捫。瘦槐軒聽小史度曲

譜得新詞宛轉歌。瘦槐軒裏酒如何。卻憐頭白他鄉客。每到歡場涕淚多。

懷柔道中

路入幽州北。春深冰尚堅。寒風人而黑。沙跡馬蹄圓。獨樹三家堡。殘笳萬里煙。古來征戰地。今日罷戈鋌。夜坐天濤秋。嘉館同賦兼東黃仙裳。

天淨雨初歇。開軒秋滿園。一蛩吟到曉。兩客淡無言。月落歸魚艇。煙消見水村。獨憐黃處士。寂寞鎖松門。

春日過育菴大令

花縣閒如昨。一官貧至今。無糧分到鶴。可賣止餘琴。簾捲溪禽入。杯銜山翠深。汪倫特瀟灑。高閣好聯吟。

歲暮薊門送友人之任臨洮

薊門西去路。我昔到臨洮。四顧沙如雪。一天風似刀。關城連戰角。官舍入蓬蒿。送爾晨風發。臨歧空鬱陶。

薊門送吳秋屏南還

落日渾河上。寒鴻著地飛。可堪懷古處。常此送人歸。竹葉山村熟。梅花江路肥。杜陵遺老在。也。一爲款荆扉。

黃

雲字仙裝。號雪樵。秦州人。居姜堰鎮。善談論。慷慨負氣。遇俗人。稍不如意。輒設罵。人曰爲狂。初受知于太守陳素。素被枉破家。仙裝不避險難。與之同遊。晚年益登苦。厭辭聘召。益肆力於詩。所著有桐引樓二稿。

陽兒之江上中途遇雪

木葉蕭蕭打蓼門。一天風雪又黃昏。辭家初放今宵棹。沽酒卻投何處村。自愧饑寒驅愛子。誰能羈旅重王孫。勞生須信難高臥。未敢懷安守故陵。

金陵下第歸夜泊朱家嘴舟中呈唐祖命

江南江北煙波接。百里乘風願亦違。宿浦纔分漁艇火。泊船月近酒家扉。露寒漸覺征衫薄。秋盡仍從舊

路歸幸有故交相慰藉。中宵痛飲任忘機。

青溪月夜續燈卷卽事

莫信繁華擅六朝。茆菴深坐話清宵。金陵萬事都如夢。月色猶留舊板橋。

送何龍若歸京口

米家畫裏放船迴。一路看山倦眼開。只恐還鄉無舊業。桃花空傍戰場開。

殷譽慶

字彥來。號蓮門。江都諸生。詩情清麗。極爲王文簡所稱。嘗集一聯呈文簡云。天下文章莫大於是。一時賢士皆從其遊。當世傳之。性狂簡。落魄而死。沈歸愚宗伯。覓其稿不得。止得近體二首。稱爲完善。有聲光云。

玉山亭

萬頃澄光倚翠屏。磯頭縹緲峙孤亭。窗收吳楚千帆白。座揖金焦兩點青。高岸浪飛遙似沒。危崖水落倒堪聽。扁舟待渡依江滸。疑有魚龍積氣腥。

暨陽懷古

此地句吳戰壘開。尙餘重鎮楚江隈。城邊斥堠連天遠。海上魚龍捲浪來。黃歇冢荒迷蔓草。延陵碑古蝕蒼苔。西風入夜鳴哀角。并和砧聲徹曉催。

與查夏重集劉鹿沙寓齋分得談字

左司吟嘯處。齋閣對晴嵐。高致傳兼隱。幽人許共探。論詩懷舊雨。隸事倚微酣。好續竹垞句。他年作美談。

贈劉鹿沙

劉子豪宕殊不羈。才名藉藉聞京師。一日騎馬偶詣我。排闥橫被閤人辭。投以蠅堂詩一帙。近體工麗古瑰奇。眼前詞人詠述作。如君直可奴隸之。復伸繭紙寫長句。謂我略亦知爲詩。篇中往往過稱許。痴嗜或恐勞人嗤。長鬚傳至讀未竟。急走相覓披詩帷。兼隱先生適召客。入座輒命留銜卮。新知一見如舊識。吾輩投合獨文儀。往時長安盛吟社。羣賢縞紵恆相貽。十年消長不可料。此事亦逐流星馳。靈光猶幸有人在。騷雅壇坫勞總持。如我曹槍洵小國。亦願結束隨旌麾。

題黃硯旅出塞圖

邊城一抹曉。噉紅魚海龍堆。指顧中莫向離亭折楊柳。玉關長笛怨春風。

張漢瞻歸嘉定

十年重作燕城客。吟過春城阜莢橋。興盡剡溪逢改歲。打船風雪晚蕭蕭。

張

璣字中玉。號琢堂。儀徵人。康熙癸巳恩科武舉人。少時馳騁。妻馬。而詩筆高潔。與聞鶴翁爭鋒。著有琢堂詩鈔一卷。

春中過蘿園二首

梅花開欲殘。草色萋已綠。往苒逮春中。兩足日瑟縮。園林得散步。憑軒恣遐矚。一桁江南山。濃翠出新沐。此地吾舊遊。飛觴記平素。繚曲認空廊。依稀存竹樹。光陰隙閒駒。年華已非故。根觸發長吟。斜陽戀歸路。

秋夜同友人讀亡友方咏亭詩稿有感。

月白霜清鴈影寒。把杯相對說方干。十年客向淮南老。一卷詩留硯北看。豈是才人生有數。近知天道問原難。高吟尙記從前事。細翦燈花到夜闌。

京口泊舟。因登銀山絕頂。

潮落江關路。同人小泊舟。攀林登絕頂。極目俯長流。衰草南徐岸。殘陽北固樓。一帆春水滿。載酒擬重遊。和李琴齋明府暮春遊蔣園二首。

爲愛林亭郭外閒。烏衣小隊叩柴關。春心容與澹臨水。望眼迢迢青對山。麥秀宛迎官道合。雉飛恰趁後車還。應知此際追陪客。已醉光風霽月間。攜尊重上木蘭船。盡啓篷窗眺遠天。勝地自宜山簡醉。雅懷真比竹林賢。三年花縣人如玉。百里江城吏似仙。好句傳來期屬和。空齋踏徧幾曾眠。

王西浦招集也園。余以事阻。邗上歸而補作。

風雨滿蕪城。客舍如年度。勝遊集朋侶。遙念招攜處。苔磧上春潮。羅軒匝芳樹。揮翰落雲煙。飛觴道平素。日月不我留。青春行欲暮。歸掩東原扉。悵望城南路。

立秋後一日。過峨嵋院。

偶入招提境。因登小閣頭。江天餘落日。雲木澹新秋。白鳥一羣下。清泉三面流。眼前足圖畫。何必羨滄洲。

送鶴筴之碭山廣文任。卽次留別韻。

宦遊難遽別。顧我北山阿。秋樹正搖落。故人能幾多。一鐙侵夜坐。孤月送雲過。重念舟車路。行行傍大河。

初冬同人掃楊莢亭墓

故人埋骨北山巔。來與招魂訪墓田。老淚西風沾野草。孤筇細路入寒煙。新愁迢遞荒原外。往事蒼茫落照邊。絮酒一卮同醉處。未吟遺句已淒然。

壬申夏五同鶴筴芷岸藍田書屋坐雨

竹逕迷濛暮色橫。羊求重興續前盟。林深五月有秋意。節近三時多雨聲。吟社未移江上櫂。閑牕且話別來情。何年共結東菑屋。蓑笠相從事耦耕。

張

字巽言。號暨桐。歛之柔嶺下人。占籍江都。善交友。常載酒湖舫。爲文宴之會。尤喜藏書。詩文成帙。歿後多零落。

貧士

貧士柴門裏。高吟乞食詩。苦緣甘世棄。清尚畏人知。椎髻梁鴻婦。蓬頭孺仲兒。北風正淒緊。誰爲半甌遺。

房縣哀

哀前縣令。贈太僕卿郝公景春也。崇禎十一年。羅汝才詐降於熊文燦。以九營之衆。散處竹谿保康間。而房適當其衝。居民日惴惴。公時爲縣令。拊循備至。明年。張獻忠反穀城。約汝才同反。賊騎大至。監軍僉事張大經。已降賊。煎檄公降。公大罵碎其檄。與子鳴鸞謀戰守。時城中僅贏卒二百。乞援於文燦。凡十四往不報。鳴鸞本諸生。振甲登陴。擊傷獻忠左足。將用間襲擒之。閱五日。指揮某。啓北門招賊入。公與

守備楊道選。卷戰不屈死。鳴鸞與僕陳宜。主潯未邦。聞其不屈死。主聞。贈恤有加。建祠祀之。公故揚之江都人。舊有祠。在城西法海寺側。丙戌秋。予偶過是地。遂肅謁祠下。歸作是詩。且徵和焉。

黑雲壓城城不開。房縣四郭蟻賊來。九營之衆燄方熾。生降妄受眞庸才。鳴梟野性誠難格。變起一朝還構逆。披堅執銳賴何人。羸卒倉皇惟二百。使君一身繫安危。登陴含淚親揮旗。連天銅馬盡充斥。極地飢氓無子遺。公子書生稱智勇。橫刀臨敵龍媒鋒。岳家自有銀官人。辟易萬夫皆震悚。誰與揖賊自開門。驕帥紛紛各竄奔。慟惜名城齊陷賊。彈丸如此更休論。忽傳檄至爭開視。乃是勸降書一紙。含垢監軍但願生。裂眥縣令惟知死。一門義烈震鄖襄。郝氏勳名載太常。楚些招魂到鄉國。叢祠異代永烝嘗。秋日閒行柳湖側。牆角苔碑土花蝕。不堪細讀舊銘詩。瞻望靈旗長太息。當時撫賊誇奇勳。廟堂建議徒紛紜。轉念坑降計亦得。只嗟世少武安君。不見思陵憑玉几。盱食平臺亂難弭。豈獨撓鋒房縣哀。喪亡禍本從茲始。張符驤。字良御。泰州人。康熙辛丑進士。翰林院庶吉士。

清明後十日會葬故友閔賓連于平山堂下。

楊柳花中盪槳行。孤墳芳草近清明。知君芒屨行吟慣。試看山光與案平。

吳

遵。字賓洛。江都人。

遊西谿

絕境鮮樵牧。始知山已深。輕舟泝流水。斜日在幽林。有鳥鳴深樹。無人知素心。不煩絲竹韻。萬籟有餘音。

汪

楫字舟次。號旃齋。祖籍休寧。居於江都。官贛榆縣教諭。康熙己未。召試博學宏詞。取一等第十五名。授翰林院檢討。纂修明史。癸亥。奉命冊封琉球。充正使。遇神祖。三日而至。呈示禮成。且爲其國撰孔子廟碑。文章華茂。焜耀海疆。有餽饌。卻不受。國人建御命亭志之。四十年後。復有使琉球者。其國禮儀。猶遵旃齋所改訂。有時僧崇實。年七十餘。尙誦旃齋詩不輟。其所以孚遠者可知矣。旃齋以才略出授河南府知府。在任。置學山於嵩陽書院。聘耿詹事介主其事。擢福建按察使。晉布政使。治績尤著。內陞京卿。沒於途次。從祀鄉賢祠。旃齋性簡介。不妄交。意所不可。雖尊貴未嘗以言徇。南昌王于一。客死錢唐。旃齋素未與締交。爲之欲贈。又搜集傳其遺文。其重道誼類如此。新城王文簡公稱其詩。以古爲宗。以潔爲體。以清冷峭犄爲致。尤爲周樂。閻亮工稱服。三十後。歷遊四山白岳。詩境幽深。孫豹人枝辭。謂其製利爲鈍。不可測識。入詞館後。典重高華。四卷。旃齋集一卷。山間詩一卷。山間詩續集一卷。消寒集一卷。觀海集一卷。京華集一卷。

送吳五賓賢二首

霜林棲鳥啼。蕪城天不曉。行子急道路。仰視參與昴。年年歸此時。芒屨踏枯草。寒水結澌澌。朔氣令人老。歸家常苦遲。出門常苦早。子康有賢妻。鋪糜共亦好。

郊原積冰雪。日出光泠泠。萬物苦閉塞。只待春風生。君今已皓首。毋庸歎飄零。在天亦有雲。在水亦有萍。丈夫惡飢寒。何以垂令名。飲水被鶉衣。高節誠可貞。

歲暮南村寄懷周櫟園先生

端居鬱不樂。徙倚開雙扉。曠野何蕭條。寒風吹我衣。臯蘭無遺秀。原樹號枯枝。翔雁鳴離離。離獸西北馳。褰裳望所思。層冰塞河湄。歲暮多苦懷。宿昔願屢違。明珠辭水底。沙石無光輝。古琴塵匣中。悠悠感鍾期。

題五子罇酒論文圖

渭北王幼華來江東。與吳楚人。孫豹人。都羽。吉。汪舟次交。命曰五友。繪圖以歸。分賦。

汪子無才負傲骨，尋常出門少親暱。僻壤相逢吳楚人，風塵意氣膠投漆。楚人之友亦落落，論詩共許孫與郝。幾處歌聲向一燈，吳陵新安與焦穫。焦穫自昔多名家，孫郎動向人前誇。眼中難見李叔則，戶外忽來王幼華。王生結交殊不苟，屈指素心惟五友。預愁他日走長安，不似於今時聚首。西湖戴蒼能寫真，遊子不顧囊中貧。卻將渭北江東意，圖成罨酒共論文。更有黃山江天際，畫水畫石多生氣。援筆添寫兩株松，百尺寒岡接蒼翠。裝來卷軸喜同看，皓首孫郎酒不乾。郝子撚鬚時欲笑，吳生抱膝動長歎。汪子把卷苦抑鬱，王生惜別何辛酸。王生王生勸爾且盡尊前歡，明日徒從紙上觀。

題天女散花圖

王阮亭先生小像

維摩說法天雨花，此事由來稱最幻。諸大弟子徒紛紛，況於楫也何山辨。朝來問字抱琴堂，倏見維摩臨素練。異人豈必多口耳，髭鬚常風目含電。白鸞尾動虛空驚，十丈雲開露金釧。繽紛紅雨隨指墮，清淨天人殊繾綣。我對此圖長咨嗟，人世簪裾何足銜。妙義要使千人服，寂寞緼牀亦堪羨。前身或在方丈中，不知曾否沾花片。或語汪生且勿哂，君不見阮亭詩法動塵寰。此圖自寫王公面。

題程氏小樓

山盡忽登樓，園林一望收。池平全藉雨，桐老不宜秋。入座圖書亂，開罨風露悠。敞廬雖接近，薄醉卽淹留。

尋影園舊址

同郝山漁賦

園廢影還留。清游正暮秋。夕陽橫渡口。衰草接城頭。詞賦四方客。繁華百尺樓。當時有賢主。誰不羨揚州。
晚發白沙

北風初作雪。逋客正辭家。濁酒當寒水。輕帆入暮笳。燈明村犬吠。潮落榜人譁。歷歷疎星外。江煙起白沙。
送韓醉白

韓生挾劍走燕都。相送東門盡酒徒。十載飄零豪氣在。春風春雨唱驪駒。

中秋夜施愚山先生招集龍山

邀月層巒上。傾樽畫舫中。水明全滅燭。風過一推蓬。直樹無棲鳥。圓沙有釣翁。夜闌莫辭醉。清興更誰同。
暮抵香城山寺。有懷周伯衡觀察。徐伯調。陳伯璣諸子。同愚山阮懷限中字。

溪聲一徑入鴻濛。逐水尋幽路不窮。野菊背開巖石下。歸雲倒捲亂流中。峰迴幾處江湖白。日落前山草木紅。卻望會城何地是。疎鐘肅肅起飛鴻。

青原道中

得著看山屐。山行不厭遲。岸崩懸老樹。花落挂游絲。鳥路望中是。虎風何處吹。雨過石壁淨。應許獨題詩。
揭子宜過訪

奇人曰揭喧。健翮恥飛翻。斫地劍三尺。寫天書萬言。著有寫天新語。好風吹草屨。細雨到柴門。高論知何極。相傾

只酒尊。

去五老亭可三十步。一石巋然萬松間。方廣盈丈許。外眎如削。間極上人手種海棠其側。時臥遊焉。索余題名。因名之曰不化。竝系以詩。

壁立萬松坪。天然削不成。坐應從五老。夢可識三生。花落茶煙少。人來積蘚平。遠公幽興極。留客一題名。

過山溪石壁

萬山勢欲合。一水書然分。夾岸攢烏石。中流湧白雲。瘦驢停折坂。獨客畏斜曛。莫問驚人句。溪聲不可聞。

白岳天門歌

誰將脩月斧。劈此摩雲石。石開雲散崩崖懸。欲墮不墮五千尺。絕壑初來日月光。猛虎驚迴風雨夕。洞傍飛瀑出重檐。人過不使衣裳沾。晴空滴盡老蛟淚。雨後幻作蒼龍髯。學語小兒作解事。碧落遙挂珍珠簾。我來山中歲欲暮。時向天門踏雲路。直須老此莫教還。君不見留客遮門老楠樹。

送周伯衡給諫之荊州

時以保舉赴軍前。

推轂存知己。飄蓬急感恩。老兵輕白面。大帥重黃門。九月鴻難聽。何時蝨許捫。馳驅與休息。帷幄正須論。己未元日。曹舍人頌嘉。招同豹人。大可。錫鬯。其年。永壑。天章。石林共集。遲武曾。次耕。西崖不至。限韻二首。

輪蹄紛歲首。吾亦啓柴局。不愛五侯宅。來傾雙玉餅。辛盤春早得。豔曲老能聽。彼美知何處。真同望尹邢。椒漿期短褐。花底脫朝衫。願問何人獻。杯先少者銜。定須判_平一石。久矣忘_去三緘。四座休輕別。羈愁仗汝_平芟。

秋日奉陪益都師。暨諸同人。集萬柳堂。卽席和原韻二首。

蟬聲已辭樹。鴈影正橫天。白是林間露。青來水上煙。尋秋宜漉酒。席地好聽泉。百道穿畦圃。風濤共灑然。別墅同安石。新詩得惠連。羣峰擁絲竹。四座落雲煙。便可凌員嶠。何須乞酒泉。歌殘踏明月。不醉亦陶然。官定後詣闕謝恩。次對巖前輩韻。

漢宮名籍忝初通。海曲龍山詔許同。鑰啓雙魚隨旭日。樓開五鳳入薰風。星辰依舊排天上。桃李誰誇出禁中。自是關門多盛事。不教昭諫老江東。

三月三十日過蛟門寓舍。值賦漫興。詩成索和。

春殘絕少惜春詩。授簡無情滌硯遲。風日祇教添白髮。粗豪豈合寫烏絲。最憐深院飛花候。正爾幽窗屬草時。得句故應誇獨步。劍南堂奧少人知。

山房昨和牡丹詩。擊鉢聯吟幸不遲。黃霧一朝封麗日。軟塵十丈壓游絲。無多白白紅紅地。可惜鶯鶯燕燕時。幾瓣落花今在否。護持深喜道人知。_{前三日。同過天壇看牡丹。各有詩。詰朝風霾大作。花盡敗矣。}

謝家兄弟總能詩。夢繞池塘聚首遲。幾畝秫田供麴米。一盤鹽豉煮蓴絲。鴈違燕去無多日。人送春歸又一時。處處鳥啼聽不得。幽懷只許脊令知。有園長玉叔正閑兄殿居少文諸兄弟

三年不作憶家詩。得遂烏私去敢遲。快意便應吹鐵笛。懷歸何用理桐絲。板輿四望宜佳日。鳩杖雙扶合此時。水綠波平帆影疾。一行先報老親知。

賈太傅祠

在城東夾馬營。即公故里也。祠久荒落。今修葺略還舊觀。

端賴吳公說賈生。少年猶幸早成名。蕭曹有命稱賢相。絳灌何知只老兵。學到離騷難作達。人能痛哭豈無情。遭逢如此還淪落。遺像空留夾馬營。

白馬寺

石渠虎觀日紛紛。雄辯高談已厭聞。忽白佛言真逸調。獨逃秦火定奇文。梅檀直結千年霧。榆櫨遙封萬里雲。歎息無端勞白馬。不成龍象不從軍。

平泉

李德裕園。向在龍門西。德裕嘗自爲記曰。齊平泉者。非吾子孫也。以平泉一樹一石與人者。非佳子弟也。歐陽公嘗譏之。

別館離宮百不存。荒邱誰識相公園。木棉作雪欲蓋地。火柿帶霜時出村。勲業自知銷黨局。晏游安肯訓兒孫。英雄不是耽泉石。無限恩仇未可論。

出門

勞勞息無時。忽忽歲云暮。老父呼我言。家宿難久住。王程幸未迫。閩疆應早赴。老母拍我肩。兒無憂內顧。孃今頗強飯。耶又齒牙固。及此勉王事。爲喜勿爲懼。諸弟漸成立。幼弟行當娶。祇此仗作計。其他勿復慮。聞命敬再拜。氣塞語難吐。俯仰真踟躇。出處總乖忤。忍淚作大言。乘風兒所慕。

天王大神聖。天使百靈護。夏至七日風。大海直飛渡。曰歸寧久淹。屈指在寒露。春正開八袞。歸來慶初度。相風憑木鳶。計程報尺素。下堂不盡觴。趨起猛虎步。

黯淡灘

灘急不聞呼。千車轉轆轤。神工較分寸。鬼伯待須臾。曲折憑孤櫂。安危仗一夫。會看浮萬斛。大海射天吳。出五虎門。同石來次前。使蕭給事韻。

長年振柁倚高樓。萬里潮迎萬斛舟。浪打白頭都是雪。衣添六月忽如秋。蒼茫不覺千山遠。混沌真看一氣浮。最愛乘風同快馬。漫將喘月笑吳牛。

過東沙山。是閩山盡處。同石來次蕭給事韻。

揚帆從此別巉峴。鉦鼓爭鳴大旆飄。盛浪最知三老健。跳波真有百靈朝。砰訇地軸聲初轉。蕩激天河影共搖。去國迴看忽千里。無邊藍水接青霄。

海水歌

好風歛吸來西南。鞭船疾過驅歸驂。茫茫大海百無有。上天下水中舟三。我舟使風得風力。縱經時與長年參。支干在掌辨方位。一鍼東指凝如鑢。須臾兩帆盡相失。碧空遠影同優曇。蜃樓蛟室定何處。岱輿貞嶠憑誰探。決背窮髮祇一碧。摩空浴景相波涵。吁嗟太古積此水。誰其漸染如斯藍。或云青天落重溟。有如白月澄秋潭。豈知此水渺難極。紛紜萬象中能含。源深體靜露光澤。玻璃映澈還幽閒。彼蒼蒼者海氣耳。上浮何異山之嵐。木華張融少所見。憑虛作賦寧無慙。提鉛握槩肯相就。太虛空洞吾能談。

神廳

驚濤萬里勢搏空。三日神廳笑卷蓬。此際高堂念游子。猶從五兩祝南風。

落帆二首

颺舟信所如。那霸忽而至。僕夫蹶然興。振衣疑夢寐。徐聞三老說。咄咄真怪事。水程傳自古。七日風最利。如何甫三宿。鷁首接平地。按圖記所歷。十未經三四。凌空語豈妄。飛渡亦何易。捩柁赴曲港。崕呀轉心悸。風潮兩相赴。迴環任吾意。落帆成一笑。茲行了不異。積水渺無極。塊然橫一邱。洪濤日春撞。土壤能長留。草木互蒼翠。日月相沈浮。摩肩來婦子。語笑爭啁啾。海日射便面。搖光如蠅黐。未辨風俗殊。亦覺生聚稠。安知十洲外。此間非一洲。回頭笑愚公。神仙何足求。蓬萊亦小島。未必非外侯。執玉倘來賓。皇帝同懷柔。

長風閣喜雨

三年荒微望甘霖。一夜輕雷送好音。有腳春來天子惠。隨車雨足使臣心。蕉花穿戶紅全濕。橘葉遮垣綠更深。見說塗人歌且舞。老夫高眺亦長吟。

冊封禮成卽事

夜雨廉纖快曉晴。相看搓手賀昇平。海風不動秋風勁。吹作嵩呼萬歲聲。龍跳天門下碧虛。光芒萬丈掩瑤璵。海邦一任誇多寶。豈有珍奇重御書。紫巾黃帕繞丹墀。鼉響鯨鳴羽扇欹。獨上龍亭呼萬福。錦衣紗帽好威儀。石城百尺擁王宮。渾樸規模自不同。巖壑迴環松影外。樓臺隱現海光中。

馬耕田歌

中山山多稻田寡。耕不見牛時見馬。曳犁負輓常叮咛。編草綰頭泥沒髀。噴沫徒憐氣凋喪。跼蹐安知材盡下。王良伯樂無時無。不待悲鳴淚先灑。側聞洪武開國時。曾來此地求騶驪。連櫓累船動千匹。購買不惜傾高貲。陟險衝波有底急。每繙舊史常懷疑。維時布衣起江左。渙號止及東南陲。壯士健兒恣騰蹕。步卒敢向中原窺。圉人太僕但充位。登牀厭穀皆虛詞。誰歟忽建鑿空計。外廐祇藉長風吹。飄飄遠致列雲錦。騎出奚啻熊與羆。永辭絕域騁皇路。寸長一技皆得施。不走沙場繫馱畝。吁嗟爾馬生何遲。今制三年

兩入貢。使者執鞭大夫控。天子垂裳顧曰嘻。此物何煩跨海送。異域從教寶驢驘。天家絕不求麟鳳。終老邱園何足惜。竟辱泥塗亦堪痛。吁嗟爾馬無自傷。不逢湯武逢虞唐。縱有龍媒四十萬。中山只作華山陽。長史鄭洪良。以王命請余畫像留國中。口占答之。

豈是中朝第一流。偶持龍節拂麟洲。大名那得齊諸葛。遺像何勞比益州。稍喜文章堪報國。誰憑骨相取封侯。靈臺一片真難狀。多謝傳神顧虎頭。

姜任修

原名排。字自雲。晚號退耕。如皋白蒲鎮人。學士秦大士傳略云。先生少孤。不問家人生產。爲經世之學。天文地理禮樂刑名。及詩古文詞。無不精貫。旁通六壬奇門。醫卜星相青烏之術。與夫吹竹彈絲。騎射拍張。書畫奕算。皆詣絕品。冒巢氏曰。姜子早飲香名。常突過陳縣。陳縣者。其年險計也。儀封張清恪公撫吳中。見先生文。奇之。招致幕府。與講洛圖之學甚契。一時學子翕然從之。康熙庚子。舉京兆試。易名任修。辛丑。捷南宮第三。授翰林院庶吉士。癸卯。散館。一等。時重守令親民之官。特簡知清苑縣事。聽斷如神。案無留牘。任事凡五月。卒以剛直罷歸。晚年患足疾。一榻蕭然。猶讀書不廢。年七十六卒。著有讀易輒書五卷。讀詩小箋六卷。漢魏六朝詩釋四十卷。唐五七律釋八卷。楚詞釋十卷。白蒲子古文十二卷。時文若干首。白蒲子編年詩三十六卷。

春遠

野燒凝寒未轉痕。陽春何日到衡門。從教射虎難封廣。底事聞雞便舞琨。萬古羽毛空碧落。半龕燈火送黃昏。成蹊桃李爭時豔。凍蘂消香是故園。

崇川北山下。拜略臨海墓。

古墓犁田出石稜。題名不是比邱僧。斷雲墊鶴黃泥口。誰向秋風葬略丞。

園居

相隨鷗鷺作樵漁。計向西河結小廬。非爲倚窗堪寄傲。本來閉戶得安居。麤豪班掾輕投筆。窮老虞卿苦著書。惟有灌園陳仲子。一生樗散把犁鋤。

看劍

膽有狂奴態。誰爲斫地歌。眼看三尺水。心受十年磨。卻讓鉛刀利。仍然結友多。底須不平事。暗匣夜鳴鋸。

姜恭壽

字靜宰。號香巖。如皋人。任修子。乾隆辛酉舉人。工篆書。善畫事。詩宗魏晉。常往來閩楚間。雷翠庭中承欽。督學浙江時。佐幕府。有詩云。燈花吐燄處前席。莫謂無神鑒此衷。晚年病耳聾。怛怛以死。臨終。

命以古玉二枚。華嚴經一部殉殯。所著文集二十卷。阜原詩集十六卷。五叩錄時文一百二十篇。

咏秋花

欲雨不成雨。秋風原上來。稻花綴其英。柴門晝不開。烏犍臥牛宮。陂塘亂鳴蛙。豈無蘭與桂。而非余所諧。

昌昌天地心。邈邈黃農儕。浩浩君國恩。悠悠沮溺懷。稻花。

暮色落秋旻。蒼然生老圃。庚庚隴眼籬。紛紛豆花雨。豆花旣以白。豆莢亦成縷。晚飯臨涼風。秋實腴堪煮。

上有青蟲縣。下有寒蟬語。霜田落爲萁。小人良辛苦。豆花。

季女抱素姿。獨向空階立。冷墮白玉簪。蒼煙不可拾。回首背西風。秋苔濕珠鞞。彼姝漢水濱。解珮殊戲狎。玉體未分明。語之頰兩頰。涼院下魚輪。風簾蕩犀押。金蟲栖香鬢。水蟬搖寶釵。粉身玷不磨。皎月照幽闥。

玉簪花。

芙蓉江上秋。芳華擧木末。昨夜風雨橫。佳人與我別。丹萼委晨霜。可憐紅瑟瑟。欲采寄微波。秋光不堪折。驚起雙鴛鴦。波冷花搖光。花光搖不定。心與江波長。

芙蓉。

秋水不受染。芳杜搖孤翠。白雁下橫塘。照見相思字。天末懷夫君。日暮期不至。江南可采蘅。西風吹垂淚。別去可復論。露華易蕉萃。

杜若。

古巷買秋槐。積滿門前路。衡茅閉蓬蒿。苦花變涼序。青蟲棄不蝕。黃雀食還吐。寂寞巢居子。老屋但因樹。日暮陰漸疎。高臥尙如故。榮落定何如。元駒別枝去。

槐花。

寒露濕茸茸。腰極灰古薜。荷花紅欲死。秋羅不堪翦。翦羅持作衣。化爲雲與泥。翦羅持作裳。莫繡鴛與鴦。鴛鴦盡飛起。秋風怨羅綺。白髮翦易生。淚眼看花幾。

翦秋羅。

題梅花

一枝瑤蘂倚春風。鶴去寒山夢已空。記得夜深林下過。月玲瓏又雪玲瓏。

姜文載

字在經。一字命車。別號西里。如阜人。任修子。弱冠。補博士弟子員。與兄香巖有二陸之稱。能畫。年三十而歿。有四里存稿三卷。

春興

花信分番又幾回。香飄紅杏晚風催。荒墳有骨埋青草。石馬無聲臥綠苔。曉夢依稀迷化蝶。春情靡曼逐

飛灰相思竚立欄干久。雙鯉何時到玉臺。

一片光風任渺茫。瑤臺十二冷雲漿。懸知腸斷魂難斷。空負花香酒更香。鶯語上林芳信早。鶴歸華表晚陰涼。江南夜夜愁春雨。莫看殘紅到海棠。

李仙榜 字松蘿。儀徵人。著雙桐閣詩草。

楊柳詞

楊柳青青鎖暮煙。春來常漾落花前。但愁眉黛今如許。一墮秋風便可憐。

雪霽

雪晴寒轉劇。枯坐恐難勝。醉客酒無力。觸簾風有稜。縕袍且復著。篝火時相凭。爲問老梅樹。今朝開未曾。

戴勝徵

字岳子。休寧人。康熙間。居泰州之東湖及河阜。因家焉。愛遊白嶽。以舟載其石歸。因號石桴。窮居海濱。吟詠自適。與吳野人同歌嘯於寒蘆野水間。著有石桴詩鈔上下二卷。又名河干草堂集。石桴五言。如西橋

黃儀通故居云。冰天寫疎樹。夕照閃昏鷗。涇河云。秋柳不藏日。晴川始度鴻。時人稱之。

三賢祠

祠祀監西溪隱翁范文正仲淹。轉運使胡文定公儀鈔。運使張文靖公靖。綸。

范公倡大義。胡公翊贊之。張也良足智。屹然不易詞。海堰一朝捍。杭稔始及時。上德合欽世。居人因廟祠。歲時曾有幾。風雨悲傾欹。羈禽語暗牖。旅穀生荒墀。落日坐懷古。遺澤猶堪思。

河阜歎

雷霆動天地。淮泗決洪濤。驟漲滿堂室。四顧皆滔滔。雞飛屋上叫。犬蹲牆頭號。家人聲慘裂。水勢檐前高。魚鼈互跳躍。相顧樂其曹。蛟居誰見慣。隣舍偕我逃。三日絕火食。千錢賃小舸。同難煙波中。日瘦風蕭颯。由河阜復遷東淘。

棲遲稍已寧。宅舍今又移。束裝治糗糒。去去長此辭。阿母撫雙版。雨面紛涕淚。是我平生居。今何棄置之。長跪我母前。請聽兒陳詞。水來飛鳬鴈。水涸長蒿藜。旱澇皆不可。徒煩母勞思。即便理舟楫。友朋送河涯。相過念往昔。相顧徒傷悲。遠林樹曖曖。大澤波瀾瀾。問我來何日。浮雲無定期。

孫豹人見問近況

枉作年年計。仍然一畝宮。賤貧生侮慢。兒女困英雄。衣競秋雲薄。顏輸晚葉紅。門前溟渤是。會有怒鵬風。

西莊

只借莊西一面看。荷花開徧又開殘。極天路認孤煙細。近海風多六月寒。老馬豈難辭棧豆。翔魚端不慕綸竿。寒來無那蒼茫甚。擊劍長歌興未闌。

重至松岡弔葉紫台

黃葉清波照別離。十年前景入安宜。月明小縣城關早。煙闊長淮漲落遲。古劍看留吳季淚。秋墳不唱鮑家詩。松岡草露霑霑在。最是思君獨上時。

種木棉花歌

木棉花種今年來。鹵鄉潮水東南回。治我繰車理我軸。再遲幾日花齊開。朝出剝草。暮出剝草。草少花多。草多花少。經過老農笑啞啞。儂家只種黃花稻。種稻不教婦子忙。用稻易布衣滿箱。

有寄

小檻積春陰。閑庭半薜侵。養花雲過厚。藏蝶葉偏深。莫易山香舞。須憐莊舄吟。伴人雙語燕。可一寄歸心。

孫

字沂公。號彭池。江都生。詩宗香山放翁。一時從游。多名下士。程定先殿撰。郭南江解元。皆出其門。卒年八十有六。著有奎聚堂詩稿。

次汪爾耆看花二截句韻

髻雪飄飄劇可憐。看花還趁艷陽天。珠璣筆底春無買。不信光風屬少年。老態何心倚嘯歌。春光不放眼前過。輕晷一兩香泥濕。人到花潭得句多。

孫玉甲

字殿雲。號雪隱。江都人。沂公長子。以邑廩生舉優行。知福建寧化縣。熟於史事。有讀史偶吟二卷。

食荔枝

忠州圖裏憶年年。何意芳甘到綺筵。丹殼擘開珠馥郁。寒漿嚼破玉勻圓。春涵軟綠香如醴。韻寫輕紅句欲仙。日啖嶺南三百顆。老蘇風味有誰傳。

朱

搢 字象山。揚州人。

喜晤王己山夫子

桃李門前附一枝，重披絳帳覲光儀。百無一是空憐我，十有三年愧事師。薄技漫勞宗匠許，微名空被巨卿知。宵來銀燭春風裏，深慰彭宣數載思。

巴

鑒字宗格，號秋函，儀徵人，太學生。著秋燈集一卷。

秋來

閒情難遣自年年，每到秋來意惘然。疎雨一簾香篆杳，清風半榻枕函偏。衿衣乍換還生感，紈扇初捐亦可憐。莫怪夜深貪坐久，待看桂影月中圓。

束志

字凝白，號柿原，江都諸生。與弟沛思同居終身。朝夕唱和。吳穎長銳贈以詩云：卻羨裴休家畧裏，一門羣從共談經。著有柿原詩稿一卷。

曉發常山

曉風收宿雨，曲澗響春流。雲退千山靜，峰迴一徑秋。酒旗橫樹杪，花葉上人頭。詎惜程途遠，嗟余白髮稠。

束智湧

字沛思，號柳塘，柿原之弟。以友愛著。時人謂之二束。有柳塘詩稿一卷。

吟贈

高士幽棲處，春深綠滿園。閒花隨雨落，燕子逐風翻。几席足清趣，琴書無俗喧。軟紅揮不盡，未得一敲門。

廖榮懷

字湘晴，一字禹門，儀徵人。著綠荔山房詩鈔四卷。

江上漁灣故址。康熙間。通政曹公棟亭。於沙漫州隙地。建亭曰漁灣。嘗集漁人。捕魚於此。二十年來。惟存老樹數株而已。

江上漁灣草樹平。偶來憑眺不勝情。鎖沈風雨亭無迹。占盡煙波地有名。荻葉漫抽春雨碧。蓼花遙映夕陽明。釣竿酒榼從誰問。愁絕南山一桁橫。

袁爾職

字眉山。泰州人。

落燈後。同人歸自都門。小集。兼懷田有君都下。

紅燈竟夕醉餘輝。談笑煙花二載違。且共聳肩春甕暖。漫嗟點額禹門歸。村畦翦韭金芽嫩。江市尋魚玉乳肥。爲問傳柑朱邸客。梅邊鄉夢幾依依。

朱夢漣

字飲江。江都人。

殘梅

巡簷索笑費清思。春老江城又此時。瘦影春殘和月冷。暗香銷盡少人知。窗間嘈雜禽聲亂。樹底荒唐客夢癡。懊惱東風何太速。閉門惟有睡相宜。

朱學漢

字粹章。號清江。如皋人。

滄浪亭

背亭梅柳綠陰賒。水畔芙蓉面面花。倚徧石闌天欲暮。亂雲都化赤城霞。

解鼎基

字陽山。興化人。

渡錢塘江

錢塘舟一葉。飛渡客心驚。霸業自興廢。潮聲無古今。荒煙層樹斷。黑雨亂山沈。欲訪錢王廟。江干半夕陰。

汪從晉

字錫三。號澹人。先世由歙遷揚州。達古籍儀徵。父守仁。好施與。歲幼以數萬計。力修文廟諸鉅工。揚州親舊。無不被其惠者。久之聞於朝。賜光祿寺卿以旌之。從晉承父志。隨行不輟。嗜學耽吟咏。手不釋卷。

父歿痛祿養不逮。耶嘗謂次侍追。終不赴。孝行著聞。載在縣志。

夏日過木蘭院有懷撫生上人

諸天花雨落。幡影動高風。古院夕陽裏。客心清磬中。俗情消欲盡。往事感何窮。猶是東林寺。無從接遠公。

汪超寧

字綬遠。號恬谷。儀徵人。從晉長子。性至孝。父歿。悲號咯血。晝之所爲。必書於紙。焚檣前。且泣且告。伏地不能起。閱五月。竟以哀毀死。當事憫其純篤。亦載縣志。恬谷讀書東柯草堂。有孤鐘破雨出幽寺。

敗葉裏風敲暗窗之句。爲時賢推許。

送劉南廬歸閩中

正好商風雅。何堪一棹歸。旅懷先曉雁。鄉夢入斜暉。月上寒林迥。天空野水圍。遙知富春郭。落葉共帆飛。

汪增寧

字友千。號芸菴。儀徵人。從晉次子。早卒。

僧舍梅花

何處梅花發。招提春又生。香風山磬遠。疎影佛燈明。格與僧俱古。夜無人益清。最憐山鳥宿。帶月半窗橫。

淮海英靈集

程文正

字芻山·號范村·江都人·康熙甲子舉人·辛未進士·官工部主事·爲汪蛟門比部之壻·年四十四卒·子夢星·輯其遺稿·爲水部遺詩一卷·

采石李翰林墓

蒼蒼松柏繞層岑·謝眺青山葬翰林·天子呼來猶失意·世人欲殺亦知音·煙迷墓杏漁樵路·月照樓空江海心·鸚鵡鷓鴣杯勺好·死生有約酒星沈·

病中謝京江夫子枉問

小草一出春風吹·長安日日容追隨·平津賓客每錯履·安昌經史時披帷·一從純孝請從制·時丁太夫人憂·旋遭苦病歸求醫·金焦相望衣帶水·無由奉席同天涯·空齋故物一木榻·瘦骨憑藉晨昏支·屋梁仰望時自哂·去病棄疾何人斯·平生讀書略本草·只今背誦無忘遺·裹飯不足累子祀·書帛何意來獻之·候門稚子昧禮數·駐車不報迴軒知·渡江兩槳疾如鳥·菰蘆風起何由追·感恩知己古所歎·救焚拯溺還深思·方今爲魚半淮泗·要防千里生瘡痍·公誠康濟活國手·蒼生日望還天墀·一錢不直程不識·甘學盧家賦病梨·

古寺

蕭寺猶餘字·空山路幾重·馨寒孤澗月·僧老六朝松·定久龍吟鉢·齋遙鳥聽鐘·殘碑如可辨·階靜紫苔封·

程夢星

字午橋。號洪江。江都人。康熙壬辰進士。改庶吉士。授翰林院編修。太史少穎異。弱冠以詩鳴。迨入承明。時名流賢士。流寓者多。太史主盟壇坫。歷數十年。詩分十集。曰江峯。曰分齋。曰香溪。曰暢餘。曰蘊餘。曰

鶴南。曰五畝。曰山心。曰琴詠。曰就簡。總名今有堂集。附以耆柯詞詩。終於乾隆丙寅丁卯間。年逾七十矣。又著有李義山詩集箋注。

讀史四首

壯歲貴努力。亦須慎其儀。明鏡不藏耀。緇塵恆蔽虧。賈生在洛陽。早膺吳公知。薦之漢庭上。何難媲臯嬰。文帝守成主。紛更非所宜。年少乃喜事。邊爲絳灌嗤。長沙一見斥。弔湘徒傷悲。由來露才智。適爲讒口資。老成蓋國器。養晦姑待時。不見豫章木。辨材七年期。

習俗易移人。波流終無涯。子夏謹篤士。尙言悅紛華。漢後去聖久。益復事駢奢。石崇何如人。珊瑚邁官家。錦障三十里。爛漫明朝霞。亦知利吾財。過眼如空花。晉世不鑒戒。非分且有加。口腹奪乳哺。用之飼肥羆。高哉謝東山。豪具禁萌芽。請裘乃與綿。所以子弟佳。佳字從杜入麻韻。

人各有弓冶。士惟一經橫。蘇頌頗有子。九重皆知名。唐世尙門地。敦勉寓權衡。制科途轍啓。設網掩豪英。惜乎王摩詰。名以琵琶成。光範三上書。昌黎亦紛營。錢徽知貢舉。怨府至相傾。子弟貴苟得。豈曰父兄榮。九臯鶴則和。長松風乃清。翩翩韓東郎。雛鳳能蜚聲。

文心如人面。所見各不同。學焉得性近。豈必畔西東。有宋開景運。五季迴頽風。導源穆伯長。擴以歐陽公。

大蘇所識拔。萬象羅織洪。荆國雖異議。不以文字攻。後人拾餘唾。遂列黨禁中。東萊與西山。蒐選破愚聾。鉅手始吐氣。光燄垂長虹。人勿循世論。著書任窮通。

構李客中對月寄故園兄弟

虛幌上新月。高軒風露清。故園花事好。今夜在江城。鄰笛聽三弄。村醪舉一觥。可堪芳草路。夜夜逐愁生。

白沙翠竹江村十三詠

虛閣延晴光。白雲飛不去。沃衍江之濱。布穀鳴春樹。耦耕人荷鋤。村煙深處處。

耕煙閣。

山堂雙古柏。偶立何蒼蒼。風煙飽閒曠。永辭斤斧戕。衆鳥各有託。于茲栖鸞皇。

香葉山堂。

連延南岸山。風光幻無已。木落雙眼空。天遠一帆駛。高樓嘯清風。山靈同徙倚。

見山樓。

蓄翁及良晨。耕穫當樂歲。潔志薦馨香。孝思以無匱。望古補笙詩。明發恆不寐。

華黍齋。

秋林已晷退。落葉生微涼。候蛩響空山。中有叢桂香。淮南招隱篇。千載遙相望。

秋小山。

東亭臨水際。高柳鳴春禽。儵魚來忽去。溪水清且深。白雲時孤飛。澹蕩託素心。

東溪白雲亭。

林間一片石。溉名非姓到。積陰生層苔。蒼翠夕陽好。桔槔本無機。俯仰亦天巧。

溉巖。

數畝種絲筵。經春雨露足。初篴解籊成。穉筍尙堪束。客來坐清陰。何處有塵俗。

絲筵。

英英未零落。江上明秋霞。弱質不自持。因風半天斜。伊人遙以怨。言采芙蓉花。

芙蓉花。

矯矯雲際鶴，翩然落沙衍。石梁橫水心，江海不在遠。清唳警深宵，稻粱安足羨。度橋

香界絕塵想，跣趺聊寄意。物論詎可齊，莊生但因彼。未若老瞿曇，無非亦無是。因是菴

山草春一寸，春至非示恩。山禽觸化機，有如向我言。嘿坐孤亭中，曠然天宇溫。寸草亭

雲去四天碧，山月明似水。修梧被高岡，舉袂落梧子。幽人夜不眠，秋聲疑在耳。乳桐嶺

夢中得花殘風韞春歸疾，竹礙簾旌月上遲之句，枕上足成一律。

黯黯孤檠照薄帷，枕間強意夢回詩。花殘風韞春歸疾，竹礙簾旌月上遲。不盡愁懷難遣處，無多酒力易醒時。疎鐘又起寒煙外，虛過年華夜半知。

乞王麓臺先生畫山水

馬蹄蹄鐵車轆轤，紅塵烏帽日奔逐。長安風土苦低頭，故里溪山難到目。一官那得及向平，無已聊學宗少文。望梅止渴且自賺，臥遊圖畫窮斜曛。鵝溪東絹白如雪，好手難遇出復輟。山川面目須偉人，當前幸有王摩詰。吳中舊手稱二王，廉州安能望太常。風流不墜得家法，公曾落筆中書堂。解衣盤礴久供奉，一水一石今時重。天下至寶宜自矜，亦有成言天下共。湖州厭苦譏轍材，願公耐事毋喧脞。耳目近玩不敢論，要使江湖魏闕來。

初築篠園，有竹近十畝，故以篠名。

造化付偏性。卜築忻幽栖。五塘遠城郭。延佇塘之西。清陰忽到眼。風來時高低。猗猗十畝竹。宛轉蒼苔蹊。佳哉適我意。足以供扶藜。夕陽自相度。舂鋤呼童攜。野外無華屋。茅茨開荒畦。柴門臨野水。槿樓連長隄。寬閒留餘地。種樹青鸞鷺。昔者竹林下。傳有阮與嵇。自顧非其人。難免凡鳥題。春秋集兄弟。餽餉有萊妻。茫茫天地內。永聽幽禽啼。

篠園十詠

園在郭西北。其西南爲廿四橋。蜀岡遙邇而來。可驂目見者。栖霞法海二寺也。上下雷塘七星塘。皆在左右。因得夕陽雙寺外。春水五塘。西二詠。書爲堂聯。卽以爲十韻之次。

今有堂

謝康樂山家詩云。中爲天地物。今成鄙夫有。何古非今。卽今成有。遂以名堂。

林野有清曠。天意闕荒僻。偶然落吾手。榛莽條已闢。長嘯愜幽懷。於焉樂晨夕。

修到亭

環亭種子梅百本。花下可布十餘席。幾生修得到梅花。謝疊山句也。

誅茅面高阜。種樹南山陽。先春挺孤秀。一一凌雪霜。因之結夙契。竟體凝寒香。

初月汎

池半規如初月。植菡萏。畜水鳥其中。跨以略釣。激湖水灌之。四時可不竭。

蟾影纖如鉤。下照白石淙。向夕池上酌。一瀉傾春缸。鷗羣久相狎。來往時一雙。

南坡

築土爲坡。亂石間之。當今有堂之南。南其高出林杪。蹶小橋而升。

杖策過危橋。拾級上空翠。曲塍急春流。前林出高寺。遙見耦耕人。攜鋤話農事。

來雨閣

竹塢之西閣。可眺可咏。知舊能來。當不問今爾矣。

萬个羅清陰。蕭散人境外。舊雨時來遊。一徑入煙靄。風細殊不聞。嘹然發天籟。

暢餘軒啓菴庫而入。平軒三楹。以觴以弈。劉靈預答。竟陵王書云。暢餘陰于山澤。託暮情于魚鳥。

歸懷在山澤。好景無冬春。孤賞白日靜。佳趣已畢陳。永言暢餘蔭。企彼羲皇人。

飯松菴堂之北偏。雜植花藥。綠以周垣。爲偃息之所。故多松。其秀色可餐云。

山客了無營。提筐拾松子。食之潤毛髮。清芬味如水。願與素心友。共此煌霞髓。

紅藥欄芍藥以廣陵爲最。近無好事者。四軒新植數十本。雖無奇種。亦自可人。

不見廣陵花。一別歲云五。豐臺擅奇豔。所惜浣塵土。歸吟紅藥詞。移種及春雨。

藕廬欄檻之外。一籬界之。其外湖田百頃。徧種芙蓉。朱華碧葉。水天相映。毛詩。藥與泥迎。

采蓮去東渡。鼓枻下迴塘。日晚歌聲起。滿湖風露香。落月冷霞華。夜宿湖中央。

桂坪暢餘軒多隙地。桂三十樹。移自白門。葉濃陰皆可愛。不必花時也。

天香發遙夜。山月方銜西。森森坪間桂。綠葉含丹萸。連蜷不自闕。招我成深栖。

議復保障湖舊蹟

誅茅近蜀岡。東枕長湖曲。每苦葑草繁。頗礙鷗鷺浴。昔聞此湖水。淪漣千頃足。豈惟利漚漚。荷菱供遊目。自種青泥芹。遂令沙嶼促。販夫競刀錐。勝蹟未易復。憑誰挽清波。貯此呀然腹。小艇時一來。高吟倚修竹。

將歸新安宿城南水閣

細雨城南去。孤亭坐寂寥。晚鐘明月院。疎柳美人橋。水閣寒逾淨。燈昏夜轉遙。故鄉千里夢。初路記今宵。

題盧雅雨同年借書圖

十年軒冕一銖輕。惟愛奇書抵百城。董相有祠留半榻。下帷猶似舊書生。
時寓董子祠。

微吟

蠻箋幾葉貯詩筒。覓句多慚思未工。行徧西廊人影瘦。一痕涼月上疎桐。

小漪南詩。宋葉主簿杞。有別業淞江吳興。築草堂魚鱗溼上。肩曰漪南。王博士達。爲作漪南草堂詞。曰。仁義

上。澄潭修鱗。可以垂釣。蓮房菱實。可以樂肌。既落成。仿主簿意以名之。小云平哉。以果吾腹。猶以爲大也。

吳淞別業憶前賢。博士清詞亦可傳。竊比穎昌營水竹。小漪南似小斜川。

五脫樓詠五首。鹿門子以五瀉舟。華頂杖。太湖研。烏龍。養和詞陵。贈毗陵魂處士。作五脫詩。余齋中無

構小樓。既落成。卽以此貯之。題曰五脫樓。余因足以方處士雅思。而惠贈諸君。則鹿門意致也。因繫之以詩。

洪源方竹丈。洪源萬花谷。去岑山五里許。谷中多方竹。取以爲杖。枝節稍短。而方整明潤。絕勝天台所產。

洪源故鄉人。惠我園中竹。方外而虛中。寶此數尺玉。柱上蓮華顛。晴空寄遐矚。

一瀉子琴。一瀉子。明隆萬間僧悟言也。所藏琴云。賜自神廟。流傳山陽。處士汪敷。家。敕盤歸道山。其子以余素愛此琴。匠寄贈。

孤桐斲秋琴，散音傳葛嶧。昔聞秦雲門，禪榻曾寄迹。臨風時一彈，何似山陽笛。

綿津研

綿津山人端溪研，舊有銘，舍人余腹白購得之，卽贈余。

商邱研有銘，胡爲落市肆。舍人偶得之，精英肯自祕。愧我不中書，永負良友遺。

五茸筆格

雲間僧蔭寶，有竹筆格，中半削，凸其背，滑淨如脂，余以詩乞得之。

楚夾安筆格，形質何離奇。老僧解吟詠，余乃乞以詩。還期山心室，共參玉版師。

味諫壺

天門唐南軒館丈，齋中多砂壺，有狀如橄欖者，或惜其拙，余獨謂拙乃近古，遂持贈，名之曰味諫。

義興誇名手，巧製妙圓整。茲壺獨擁腫，贅若木之癭。呂中公木癭壺詩，嗟爾木之癭，何異肉有贅。一盞回餘甘，清味託山茗。

重訂箋注李義山詩刻題後

西崑無鄭箋，遺山昔招恨。況我千載下，敢窺祕藏。朱氏本道源，注釋未云創。所惜作詩意，蒙昧若煙障。要非扶其微，何以發高唱。時從獼祭外，一洗優孟樣。楚雨縱含情，其義某竊諒。穿鑿固不免，論說或非妄。但求古人心，寧避世俗謗。想其不羈才，詎肯牛李傍。君臣朋友間，厚意深慕鄉。美人怨芳草，遂至比浮浪。豈知寄託深，直追風雅上。荆公是知己，謂與少陵抗。杜箋匪一家，往往共頡頏。梅溪有蘇注，司諫更精當。譌誤藉改定，先後非礙妨。欲招玉谿魂，持此以爲贐。

春日懷人六絕句

攜笈年年續舊遊。小山何事漫淹留。懸知掩閣攤書夜。紅粉青燈泥白頭。

鳳樓樹

寶帶橋邊春水漫。鱸鄉亭外布帆遲。不堪回首蕪城暮。腸斷斑驪送別時。

王梅川漢時遺奴子故戲及之

楸枰著盡夜燈前。斂子匆匆又隔年。記取小江湖上路。春風一棹刻溪船。

杭革浦世駿

上車不落偏難信。卻曲無傷亦漫譏。爲問東陽腰瘦否。春來莫減一分圍。

姚慈川世銓時顛仆傷足

浮家泛宅任飄蓬。夢隔勾餘東復東。誰識鯖埼亭下客。孤山吟社小泉翁。

全謝山祖望

搖艇新安去未還。故園花已點苔斑。不知清夢耽吟處。可在西疇十畝間。

方西疇

冬自紵效元微之

冰簾貯月寒不卷。珊瑚鉤重銀縑軟。一聲呼燭琉璃滿。柘衫飄曳宮韉蹕。西子筵前歌宛轉。歌宛轉。梁塵墜。此際吳王心已醉。舞罷霸風生晚吹。錦袍新樣常筵賜。賜衣雖新妾猶冷。倒向君懷迴鳳頸。雲髻鬆。爲重整。銅龍暗咽宵漏永。斜倚紅粧呼未醒。

郭長源

字時若甘泉人雍正壬子舉人

題巖谿歸權圖

巖谿無限好。有客下歸舟。暫慰邱園想。聊同汗漫遊。川迴一塔迴。帆挂萬山秋。更羨峻嶒處。橋橫最上頭。

王文充

字墨齋江都人雍正癸丑進士翰林院編修知新江處州府

集補齋先生寓齋詠庭中老桂

藥欄矜絕豔。誰復愛幽閑。庭桂忽分詠。秋風許共攀。影曾森皓魄。老更傍孱顏。忝繼羣公後。閑情戀小山。

王履吉

字坦夫。一字庶。田。江都人。

春日憶澄江風景

黃田水帶鎖城腰。北郭危樓近碧霄。海舶人來喧晚市。石梁聲吼放春潮。蠶筐漸滿收桑葉。雉堞初高種麥苗。社鼓逢逢聞遠近。一竿斜日酒旗飄。

程盛修

字鳳沂。泰州人。康熙庚子舉人。雍正庚戌進士。改庶吉士。授編修。尋遷御史。乾隆四年。據詠史樂府十篇。進。奉上諭。輪進經史。議裁之。御史程盛修。所進詠史樂府十二章。其事實寓規。詞意婉摯。得獻納之意。與乙論經史者不同。其詩可嘉。著實內用。綴二匹。筆墨二種。以示嘉獎。嗣視通漕。請河。晉大京兆。以終養歸。籍。晚年自訂所著詩稿。爲夕陽書屋初編四卷。而冠所進樂章于首。又次其歸養後諸詩。爲南陔松菊集一卷。

詠史樂府十二章

斷畧匡

臣按。敬非時也。晉宣公見濫於泗淵。里革斷其罾而諫。公曰。吾過而里革匡我。是良罾也。爲我得法。使有司藏之。師存侍。曰。藏罾。不如置里革於側之不忘也。

泗淵漁里革匡。斷其罾。悟君王。君王聞言三歎息。阜物防貪良史職。有司藏之無忘規。庶幾見罾如見革。師存一言婉而風。置革於側無而從。不見朝聽忠言夕委棄。留衣留檻皆虛僞。前漢皇。後宋帝。

市價對

臣按。過淫利也。齊晏嬰宅近市。公曰。子近市。職貴賤乎。於是景公驚於刑。有彌歸者。故對曰。踊貴履賤。公爲是省於刑。

臣近市。識貴賤。我后知不知。胡不採衢諺。臨淄十萬生齒多。家家粥踊可奈何。踊之價。浮於履。不噢咻。誰

歌舞仁人一言省於刑。頓教億兆無詛。修德更不誅祝史。海岱千秋思晏子。

辟戟諍經。而假以離觀奢侈。楊耳目之欲。宣室者先帝之正處也。非法度之政。不得入焉。上曰善。

東方生能直諫。守法度。黜靡曼。何物賈珠兒。敢容宣室宴。辟戟陳詞意氣雄。侃侃尙有先臣風。不見申屠嘉坐丞相府。執法猶能困鄧通。

乘船戒聖臣直。勸持重也。漢元帝欲御樓船。薛廣德頓首曰。宜從橋。上不悅。張猛直曰。臣聞主

從橋安。乘船危。千金之子坐不垂。莫躓於山。躓於垤。舉步何必非嶮巇。曉人言真可聽。君不驕臣不佞。霸陵西馳騁六飛。諫草能教馬首迴。

撤屏悟之。宋宏燕見。正容言曰。未見好德如好色者。上即爲撤之。

屏風新。畫美人。美人顏色傾國姿。君王顧之情可移。情可移。即可誤。賢臣獻規君頓悟。不見精勤納諫唐太宗。不畫蛾眉書奏疏。

侍宴規。臣按。抑華侈也。唐諫議大夫蘇世長。侍宴披香殿。酒酣。謂唐主曰。此殿煬帝之所爲耶。唐主曰。卿說似直。而實多詐。豈不知此殿。朕之所爲乎。對曰。臣實不知。但見華侈如傾宮鹿臺。非興王之

所爲耳。唐主深然之。

披香殿。是隋是唐。臣莫辨。臣雖似詐。其實忠。不聞與主營離宮。露臺百金儉德崇。

從獵諷。臣按。止游畋也。唐諫議大夫谷那律。嘗從出獵。在途遇雨。太宗因問。雨衣若何得不漏。對曰。能以瓦爲之。必不漏矣。帝爲之罷獵。

油衣則漏瓦不漏。諫議微詞規乃后。罷獵從茲慎馳驟。禽荒垂戒古今同。拒關不納羸馬供。漢門候。魏筆公。

佳鷹表

臣按：杜徵求也。唐太宗遣使至涼州。都督李大亮有佳鷹。使者謁使獻之。大亮密表曰：陛下久絕畋游。而使者求鷹。若陛下之意。深乖旨。如其自擅。乃是使非其人。上悅。手詔褒美。賜以荷悅溪

紀

涼州鷹。使者諷之獻王廷。王者久不貴異物。今日何與昔旨拂。君無荒。臣有表。悉索徵求。慎微小。旅獒入貢。載周書。世間玩好無時無。

宮體箴

臣按：黜浮靡也。唐太宗嘗作宮體詩。虞世南曰：聖作雖工。體非雅正。臣恐此詩一傳。天下風靡。不敢奉詔。帝曰：朕試卿耳。

宮體詩。廟堂首倡瓊琚詞。詞雖綺麗體不正。天下靡然歌咏之。朕試卿。卿果諫。同時尙有王師旦。翠微宮頌不入選。

用筆喻

臣按：端心術也。唐柳公權爲司封員外。穆宗政暇。嘗問公權。筆如何則盡善。對曰：用筆在心。心正則筆正。上改容。知其以筆諫也。

用筆在心不在筆。結密矜莊露神骨。司封員外侍書來。片言足使君心一。萬幾操縱總心生。落筆端人正士形。平原太守顏真卿。

觀燈諫

臣按：陳氏虞也。宋太宗以上元御乾元樓。觀燈賜宴。見京師繁盛。諭近臣曰：朕躬覽庶政。萬事隨數里。纖毫者甚衆。願陛下親也。以及遠。蒼生之福也。

乾元樓。矚神京。樂熙攘。慶太平。太平有象。張燈宴。君樂須教民樂徧。焉得綺羅筵。前千萬燈。照見九州薈屋。鵠鳩形。

三司告

臣按。慮盛滿也。宋真宗初卽位。陳恕久領三司。帝命條具中外錢穀。恕久不進。屢詔趣之。恕對曰。陛下宮於春秋。若知府庫充實。恐生侈心。是以不敢進也。帝嘉之。

領三司。掌錢穀。胡爲不入君王目。春秋鼎盛府庫餘。豐亨豫大非良圖。不見朝無先識李太初。祥符中葉進天書。

諫院紀恩詩

勳華天子垂裳日。特許昌言達九霄。聖德豈猶資土壤。謙衷端不廢芻蕘。細旂廣廈憂危切。側席翹心法戒昭。染翰各能抒底蘊。一時懽懽慶同朝。

奏牘由來喜吉祥。諛言不進感吾皇。四方水旱陳丹陛。萬姓惻瘼入皂囊。已爲時艱彌罅漏。更於古訓見羹牆。殷勤問學儒臣事。誰道生知亦就將。百結寧堪綴袞龍。轉教聶聶警洪鐘。王言溥博施無倦。聖度包

荒大有容。

諸臣進奏。有識見拘墟者。必從容召對訓示。紕繆者亦曲賜優容。

前席中宵傳漢帝。更番迭直紀唐宗。何如簪筆論思日。指授親

承到九重。

房。朝擎封事候雞人。敢冀葵衷動紫宸。華袞榮褱傳上相。時桐城錢塘兩相國。傳聖旨嘉獎。

文章光價播詞臣。詩交南書

絲分銀漢。天家錦紙落煙雲。內府珍半世。耽吟空抱槩。今番溫渥被皇仁。

送同年諸庶常隨總憲溧陽史公宣諭陝西

天威震疊西人恐。厥角稽首不旋踵。吾皇欲以德服人。家習詩書戶姬孔。御史大夫惟汝諸。望重青蒲威亦棒。此番駿厲且無庸。特遣詞臣界光寵。不矜口舌欺流俗。惟以訓辭當戒董。多士斷斷奉矩規。居民各各安耕墾。父慈子孝敬長官。不見催租來赴隴。公門如市亦徒然。誰辨賤履與貴踊。凡茲實效非空言。萬民環聽神爲聳。歸來奏對明光宮。挽回風俗資仁勇。日照潼關四扇開。看君牙纛前驅擁。一載書生際會時。欽哉莫負君恩重。

陳定先領袖南宮。旋登狀頭。作四絕調之。

五更聲徹六街頭。英妙輸君第一籌。傳徧洛陽光價遠。卅年重與說揚州。

謂樓村前體。

三載淒涼冷暑秋。此番高出衆仙儔。教官金榜非難事。難在蓬萊最上頭。

教官金榜挂名時諺語也。

馬上昂藏七尺軀。風飄弦管溢通衢。捲簾紅粉知多少。盡道鬚鬚頗有鬚。

雄姿英發妙初時。三十卿材認本師。衣鉢相傳作公輔。到來已是十年遲。

衣園先生。以亞細左遷分校。年甫二十九。君今已三十九矣。

西門觀落日歌。

丁未下第留京師。禮南穆公。屢侍談議。爲述居邇時。與姚君四夢。黃君儀述。爲郊外之游。每夕陽在山。紅紫萬狀。則徘徊不能去。有西門觀落日歌。今忽忽數十年矣。余讀公詩讀之。

而醉不可得。昨檢餘園鈔本。亦復不見此詩。佳句遺佚。古今同慨。已已假歸。西郊砥步。返照入林。偶憶公言。漫成長句。非敢僭擬公詩。亦非專明落日。語云。對此茫茫。百端交集。余亦同此情也。

秋卿下直談鋒起。爲溯江鄉林壑美。西郊一帶足徜徉。日落未落光銜水。此間知己三兩人。鋪茵藉草笑言真。浩歌一曲寫胸臆。白日已匿天無痕。一自驅馳事京國。天門日射觚稜赤。舊游回首總茫然。不見當

時苦吟客。酒酣迫欲把公詩。南陵華黍亡其辭。我亦緇塵三十載。日車難駐流光馳。歸來迤邐西郊路。彷彿仙翁吟眺處。姚黃一輩逐飄風。獨立蒼茫煙景暮。

同年顧震滄棟高。以經學授少司成。召見稱旨。復膺寵錫。索詩爲贈。

千佛會通籍。依然理釣緡。非官能奪志。有母足安貧。稽古忘寒暑。殊榮出苦辛。一言資拜獻。風俗未還淳。
召見時棟高所奏對。

迎鑾紀恩詩。乾隆三十年二月。

身在江湖望紫宸。歸來兩扈屬車塵。傾陽已得瞻顏近。反哺難言報德真。卜爾期頤恩廣大。
上云。爾母九十外。精神尚好。是有百歲過的。隨即頭謝恩。昭茲翰寶骨嶙峋。
特賜春輝延景四字扁額。微臣拜手披華袞。早有榮光燭海濱。

鰲轂依光尺五天。桑麻雨露奏章便。自慙宣力常垂老。不道投閒又四年。帳殿更番同豹直。周廬環衛入鰲聯。
定例終養班次。與現任同。玉堂清祕成前度。記憶重霑主德偏。
上垂問。微翰林幾載。蒲柳心情逼老蒼。仰邀天眷語琅琅。九重乍見鬚初白。百爾猶傳鬢未霜。
辛巳冬。入覲天顏。鬚尚全黑。上問曾染白否。今鬚已蒼然。復問及。仍有不蒼白之髮。已分晨昏依子舍。豈無夢寐

到巖廊。閒居何事勞清問。
上又問家中閒著何事。對以課子課孫。因備問幾子幾孫。有出仕者否。飽食棲遲鮮寸長。

清白平生仰聖謨。兒孫繞膝樂桑榆。五車書已承家學。二頃田無報國租。得旨還歸溫諭好。重聞宣喚笑言敷。
十六七八等日。在天寧寺行宮侍班。恩諭回去。次日復於馬上呼名。促歸者再。皇仁體恤。真異數也。交衢嘖嘖稱榮遇。謂此能夸野老無。

榜後大挑選歌

宮中聖人夜不寢。一夫失所心廩廩。況今不薄讀書人。肯教濫落窮無諗。當其歌鹿鳴而來。雄姿英發鋒稜開。三十流光如電掣。形容變盡精神摧。及其老也足可惜。百里才難借前席。曷不乘茲膂力剛。功名得寸而得尺。帝心體恤入毫芒。疏導滯何多方。上者早膺民社寄。次亦車服窺宮牆。其他丞倅無不有。朝夕亦得沾五斗。差勝長安乞米時。疲驢破帽霜雪走。詔書甫下舞蹁躑。也當春風得意年。水驛山程千萬里。相逢多是孝廉船。我謂爾曹須努力。爲下爲民上爲國。夷中之詩春陵行。書諸座右長歎息。執掌劬勞分所常。整齊教化職其詳。處士虛聲從古誤。莫任擲揄起道旁。天高聽卑置郵速。幕府知人無枉曲。包苴難免漏彈文。闕冗幾曾汗薦膺。用是作歌歌作箴。送君慷慨辭山林。好將製錦饕黃手。上答宵衣堯舜心。

春晚

吳宏謨

字虞三。號方巢。江都人。

無限離情玉簫中。家山遙指亂雲東。疎梅香冷千村雪。野客春歸一棹風。明月獨隨清夜寂。殘陽半落遠天紅。將來通問殊容易。嘹唳沙頭有塞鴻。

吳宏訓

字耀文。號舸亭。江都人。

月夜過艾陵湖

客路逢明月，扁舟夜過湖。雲閒浮水淨，樹遠帶煙無。破網懸衰柳，殘燈入亂蒲。榜人知客意，橋畔酒先沽。

曉雨天池歸棹

霧散天初霽，輕帆帶雨開。水因新漲闊，人趁早潮回。密柳叢沙岸，秋雲擁戍臺。遙看捕魚者，小艇破煙來。

吳宏雋

字書永，江都人。

襄陽懷古

峴山秋望草萋萋，落日荒涼古大堤。三顧何人揮羽扇，六朝舊曲唱銅鞮。籬邊色老霜前菊，城角紅生雨後霓。家在江南數千里，塞鴻歸處海雲低。

南巖

傑閣看山夜不扃，月明山色入疎櫺。千尋挂壁瀑泉白，一徑到門杉樹青。前代小亭仍碧瓦，何年仙客守黃庭。短衣欲荷長鑊去，獨向幽巖劇茯苓。

同潘燕邱、張苦竹雨中靈山寺看杏花

寺即岳武穆故宅。

古殿無人噪暮鴉，青山猶繞鄂王家。低回六百年前事，細雨空庭落杏花。

暮雨過鹿門山

一江濃霧起寒色，滿秋林欲拜浩然墓。亂山何處尋空傳，雲夢句誰識鹿門心。余亦狂歌者，栖栖古漢陰。

送趙丈念昔歸長沙

白豆花開晚露天。呼樽同醉短籬邊。娟娟一片僧房月。曾照詩人十九年。

林樹宗 號鍾奇。儀徵人。舉人。

題因樹樓詩

室以人增重。花緣德倍馨。杯棬留舊澤。樓樹總芳型。孝思常相屬。生機永不停。一枝繁豔處。千載卜攸寧。

徐攀龍 字利人。號臥雲。通州人。性豪邁。專結納。飲酒賦詩。年五十餘。卒于蜀中。著臥雲剩稿。

暮鴉

何以日將夕。竟無巢可歸。寒能驗風信。老未息塵機。盤陣雲俱黑。爭枝葉亂飛。是誰成晚眺。倚杖立柴扉。

春日病起喜晤張桐君李參竺于聽漁館

青山未許一提壺。煙雨蓬門長綠蕪。病久故人常在夢。天晴春鳥忽相呼。貧無依倚家輕徙。桐君移居漁灣。老有交遊客不孤。謂參竺。溪上草堂攜手入。風光未覺眼前殊。

題友人紀遇圖

小樓人靜雨絲絲。欲結同心折柳枝。折斷柳枝腸亦斷。年年江上怨春遲。

黃卷 號楚士。江都舉人。

題因樹樓詩

盤錯年深見性真。松筠心蹟足千春。却嫌勢面空多事。高節何須在異人。
剝啄無聲可到門。小闌干外綠陰繁。不教白日堂堂去。花裏攤書自課孫。

孫 輯號玉峯。江都諸生。

題因樹樓詩

層樓高敞暮霞平。有客登臨倍感情。雲影已隨慈範遠。鳥聲猶繞畫闌鳴。
傳經窗下春風裊。種樹階前夜雨生。畢竟本根培植厚。花開十里發新英。

周 祥字伯祥。通州人。祇行勵操。隱處海濱。自號滄浪漁父。著滄浪歌四卷。

扁舟

踪跡如秋葉。生涯託水濱。微波雙槳綠。細雨一帆春。柳下時橫笛。蘆中閒渡人。
風開隨鳥去。明月滿前津。

朱 純字東谿。饒徵人。

吳宮如歸自京口東城話舊

與爾清談興自殊。風鴉散盡水鷗孤。淒涼莫問別來事。荷葉一池霜打枯。

古 斌原名典。字慎五。一字巖樓。江都人。與吳一山樸。江松泉昱。爲詩友。著有巖樓詩集。

東黃尹東

聞道謝康樂。時時山水間。酒酣扶阿段。詩好付嬌鬟。江左一痕月。淮南千里山。懸知遙念我。岑寂閉柴關。

題虎林僧壁

禪關閑無人。孤客寄行旅。落葉走空庭。瀟瀟來暮雨。兀然欲生愁。風搖塔鈴語。

蜀岡秋望

縹緲飛樓上。凭闌得大觀。亂松欹古色。一雁落新寒。江入淮流細。岡迴蜀道難。憑高招野鶴。孤唳下雲端。

黃元焯

字潤山。泰州人。

嘶馬客舍書壁。次抱甕軒舅氏韻。

白板屏開綠樹間。江村事事助清閑。爲貪睡味常橫榻。才放心閑得看山。破我旅愁花窈窕。驚人曉夢鳥。縣蠻。此中自信能容懶。鋤土編茅請署關。

高

字次庸。一字坦。許園。泰州人。

北垞先生昔游南梁。嘗與焦子東長倡和。茲復來而東長歿已十載矣。因題一絕句見示。遂次其韻。相逢海上話離悰。廿載存亡一夢中。太息故人邱壠在。石楠花發夕陽紅。

張

銓

字本菴。泰州人。

塞上曲

天涯盡處夕陽低。萬里黃沙路欲迷。望斷故鄉何處是。行人今在玉關西。

吳鴻紳字芻安·一字秋崖·甘泉人。

霜降後一日泛舟野望

昨夜霜初降。新寒漸漸生。塞鴻翻亂影。林樹老秋聲。野水迎孤棹。斜暉上古城。篷牕凝望處。蕭瑟客心驚。

黃子詠字芻青·一字樹莊·儀徵人。

題家弟北垞滄浪漁笛圖·次元韻

長笛一聲天地秋。蒼茫何處著漁舟。憐君弱得江淹管。到老猶擔萬斛愁。

俞 肅字爲光·號知莊·泰州人·著有落落吟。

山行

萬疊峯巒溼翠橫。分明人在畫中行。驢疲却喜能知路。山好何須更問名。倚日孤松懸鶴睡。入雲古木挂泉鳴。悠然世外饒幽趣。隨處勾留遣俗情。

秋夜

寂寥枕簟兩悠悠。雲淡風微夜色幽。竹倚窗前千个玉。月橫天外一痕秋。清砧散處孤城冷。黃笛飛來滿

院愁。自欲放懷偏刺促。是誰把酒獨登樓。

聽鶯

樓外風清日正遲。春光潑眼夢差池。聽來黃鳥雙雙語。知在垂楊第幾枝。

沈光祖

字敬儀。泰州諸生。

九日客毗陵。陳栩亭見招。卽席分韻。

老去鬚眉別後真。多君旅邸慰佳辰。餐分苜蓿知官冷。囊剩琴書笑客貧。九日蘭陵增慷慨。十年萍梗各風塵。故園風景黃花瘦。清影依依念主人。

陳從

字定先。號雙川。江都人。康熙庚子舉人。雍正癸丑會元。狀元。授翰林院修撰。充冊封安南副使。賜正一品服。

孟冬朔日。顏朔恭紀。

淑景開陽月。飛灰叶應鐘。一元貞下起。火化冶中鎔。宵旰心欽若。羲和志協恭。玉衡窺舜陞。寶籙錫堯封。赤道程南北。黃纏紀夏冬。允釐熙庶績。成作勸三農。奉朔風同嚮。來王譯更重。泰階調玉燭。庶拜慶時雍。

病中作

一自燼煙瘴雨侵。冊封安南。染瘴同京。不堪精力日銷沈。莊生怛化觀原達。陶令遺言意最深。此日空中聞甲馬。他

時遺挂痛人琴。殘編檢點應成帙。千載誰爲一賞音。

吳文璧字秀東江都人

採蓮曲

小姑年十三。初上鵲首舫。學得採蓮歌。未敢高聲唱。
溼雲天外飛。涼颿牽裙帶。不愁晚雨來。自會張荷蓋。

鄭永和字亨聲江都人

雜憶詩

呢喃雙燕語檐牙。春色瞳瞳日未斜。憶得美人深苑裏。淡粧羞殺海棠花。
六枳籬門傍水涯。相將吟到日西斜。蟬聲斷後蛩聲咽。風過秋香白藕花。
冶春詞後已蕭條。花外何人弄玉簫。剩得秋來可憐月。夜深和露溼紅橋。

閔

肇字離風一作蓮峯江都人詩骨清秀有神與張漁川馬秋玉方環山同時爲詩友著澄秋閣詩集十二卷

雙烈詩

一爲儀徵朱世道原聘妻方氏一爲江都陳國材妻周氏

赤虯忽駕緋衣下。杳杳簫聲雌鳳寡。杜鵑啼血背東風。枕函暗漬珍珠瀉。生憎燕燕羽差池。春日營巢盡棟飛。猶自強簪青竹實。可憐長憶碧梧枝。瓊消粉瘦無顏色。七載言歸思比翼。從茲絕粒赴重泉。只恐相逢不相識。

竹竿有節枯青春。幽房鬼火光燐燐。豈無三尺淬秋水。毀殘自惜非完人。單牀輾轉飢腸吼。眼裏空花大如斗。金銀檢得嫁時奩。不著耳邊吞入口。兩眶淚盡胭脂紅。玉骨一把雲鬢鬆。魂兮魂兮渺何許。亘入長天爲白虹。

重過田隅草堂有感

舊識溪邊路。草堂疎竹籬。樹成人去後。秋老客來時。白鷺一雙影。枯花三兩枝。裴回欲愁絕。鄰笛正孤吹。

屠家女

屠家小女作小婦。不愛春風好花柳。頗諳數米與稱薪。日奉大婦猶奉母。大婦一夕泣且言。我老更嫁非所論。年華十八正如水。當求佳偶爲汝婚。小婦低頭不忍應。只自燈前勤織紵。明朝大婦向東家。已受銀一雙聘。東家有嫗來始知。一哭痛於初嫁時。須臾嫗去戶已閉。再拜亡靈從此辭。劇憐白練高懸處。空梁卽是黃泉路。貧家姓氏人不聞。但識阿師橋畔住。

過環溪

移門當竹逕。插柳護山田。野水明籬外。疎梅落檻前。朝來課春作。客去理殘編。不信歸林下。郎官正少年。

題梅泚所輯廣陵倡和錄後

三度飄零過此都。一篇輯錄費工夫。也如河嶽英靈集。不是張爲主客圖。大抵好詩在林壑。可憐名士滿

江湖慙予十載同酬唱。竊恐他人笑濫竽。

過峨嵋院。

峨嵋院。獨峯上人住持所也。予每歲暮春。來遊眞州。必詣獨峯。吟咏竟日。此邦人。士多與俱焉。前年洪寶田卒。去年王洵山亦卒。今獨峯又亡。感今悲昔。遂作是詩。

年年三月此江村。今日重過不可論。爲哭故人驚白髮。況逢蕭寺欲黃昏。蒼苔舊徑無行跡。春草閒房自掩門。莫待題詩感疇昔。眼前風景已銷魂。

蒙谷采茶歌。

蒙谷在蜀岡後。唐時貢茶。有春貢亭。

蒙谷中間三兩家。滿園茶樹是生涯。雨前嫩葉從教賣。官裏而今不貢茶。報春小鳥一聲過。茶園采茶人唱歌。近日種花兼種柳。此中茶樹已無多。

晚春過讓圃

逕曲多幽草。林陰有白雲。自同南郭隱。不用北山文。野色空樓得。高花兩院分。劇憐春晚晚。蜂蝶尙紛紛。

方士庶

字洵遠。號小師道人。其先歙人。生長江都。幼年學畫山水。從事于黃尊古。後臻精詣。迨有過之。其得意之作。皆鈐偶然拾得四字小墨印。與馬麟谷。閔玉井爲詩友。內府纂修石渠寶笈。曾以其畫入錄。著有環山詩稿三百餘首。既沒。閔玉井選刻七十餘首。爲環山詩鈔一卷。

秋夜盼兒子家書不至

坐久月當戶。露涼侵鬢絲。江湖新雁少。遊子達書遲。拂簾不成夢。倚欄無限思。螢光忽明滅。已近授衣時。

內府石渠寶笈。土庶畫山水冊第五頁。曾題此詩。入竹林山樹梧桐秋月幅中。

甲寅九月南堂先生歸里計日抵家見憶代書

去日旅愁盡歸時樂事偏秋餘黃葉後人到菊花先城郭驚鄉土妻兒說墓田從來爲客久此別只經年
和閔廉風二月十三日夜登平山堂便過絡園元韻卽贈陸淳川司馬

鴉歸燈光散山月淨浮塵林際一雙鶴水邊三兩人江光疑極浦露氣覺疎巾可似王摩詰孤吟華子春

夏日過馬氏壽寧堂賞餅荷觀壁間金焦石刻因憶兩山舊遊川坡公金山放船至焦山原韻

涼堂六月深耿耿壁開北牖戶啓南一主一客避炎暑謂汪梧齋馬中宣是會未滿人十三會中原十三人金焦石刻共

題詠而我自分絲盡蠶壁窠大字列兩壁弩張劍拔須無慚憶昔尋訪瘞鶴處俯身直探蛟龍潭更思妙
高臺上立江天一覽清興酣于今揮扇對墨榻松寥海嶽恣閑談閑談冷淡灑冰雪蓮花供客如禪龕況
復茶香養龍井五泉未遜中冷甘納涼差幸遠塵囂呼吸清氣何其貪感君高誼報君書南徐筆派吾猶
堪待畫江聲何處好看山樓上藤花菴

五貺樓程香溪太史讀得處

小樓曲折仙人居檐額大字先生書憑闌風起秋瑟瑟吟咏不與塵俗俱先生手指衆目集拄杖臂格琴
硯壺云此五貺觀止矣選韻合作來無虛嗟我畫事昧六法紅絲枉滴銅蟾蜍湘江半幅剖青玉指強腕
弱多牽拘操音未審年未杖煎茶或解親竹鱸但喜清畫伴閑暇墜露焉用增流餘乘此寒桂正萋茂暗

光樓影飛雲孤。五美之傍復一醉。圓月正挂城南隅。

方士庭

字右將。號西疇。洵遠之弟。爲邑諸生。著有白華樓詩鈔四卷。

書朱順發妻劉氏事

存孤世所難。紀載緬往傑。舍己以從人。鬱積肝腸熱。嘉哉鄧伯道。遺子獨全姪。嬰杵匿孤兒。不令趙嗣絕。阿劉巾幗流。猥在臧獲列。乃抱忠義心。事與古先埒。當其主母亡。五內慘崩裂。七子悲凱風。一家具衰經。黃口紫胞兒。焚焚贅疣綴。乳哺藉他人。安望壯且茁。抱歸果羸弱。哀音似鷓鴣。揆厥致疾由。知緣乳湮缺。見者咸酸辛。聞者亦慘切。劉獨重跼蹐。何計全孤子。肯不奮力救。往苒就夭折。回頭視阿罔。肥膩白勝雪。精血縱有餘。詎堪兩兒啜。情急智忽生。義重親可滅。忍痛須臾間。恥共儕偶說。潛步出城闔。橫梁綠波截。水石聲哀鳴。母子情永訣。委棄道路旁。迫近魚龍穴。世應譏其愚。此甘計之拙。匪是恩莫酬。遑恤心如結。歸護持幼主。吞聲泣鳴咽。衆訝貌改常。屢問情始泄。舉室感其誠。相看淚流血。迄今思往事。過眼才一瞥。主慶室家完。婦歎形神竭。溯彼義憤時。寧博羣情悅。有志事竟成。所貴在勇決。孰謂婢妾行。黃羅襪迴別。翻羨女史箴。難爲匹婦設。世豈乏鬚眉。幾輩衣冠竊。矢口談詩書。矯行厲名節。憑藉六尺孤。變幻三寸舌。梗直若阿劉。孰敢與顏頤。矧復所天喪。終身秉貞潔。行年今六旬。坐見躋大耋。安得賢有司。特將大義揭。旌詔貴衡門。烏頭雙棹楔。

任大椿

字幼植。號子田。興化人。乾隆己丑。二甲第一名進士。授禮部主事。轉郎中。山四道監察御史。與戴東原。極經術。於小學制度。尤爲精覈。所著有弁服釋例。深衣釋例。字林考逸諸書。詩有子田集。錢香樹侍郎。謂其樂府思精體碩。王西莊聞學。稱其五言澹風遠響。入草左司柳儀曹之室。

青陽

駕彼蒼臨時臨總章。卣人縮鬯。羅彼椒漿。厥明燔柴。歲星皇皇。太皞之德。當發若藏。木精觸地。氣達句芒。命我司事。用格青陽。

朱夏

火運蕃昌。品彙畢遂。百物負靈。軋力於地。嘉雨旣沛。氣無沈滯。擢日披風。玉華金穗。壁贊陽光。肅將禋祀。燎薌晄燿。昭升赤帝。

西灝

金飈宵振。霜落斗高。物盛而返。生息其勞。氣所必耗。澤不能膏。歸華于實。外剝中牢。秋昊澄素。嚴威用昭。肅肅建祀。掘坎燔膏。

元冥

吉日旣筮。載祀顓頊。佳穀畢登。太祝以告。水骨旣堅。土膏旣沃。息陽於陰。用無不足。冥霰霏霏。涼風肅肅。猗歟至德。萬物斂育。

天馬

天馬來。陰山道。逐黃埃。嚙白草。天馬來。自回中。奮虎脊。負長虹。天馬來。炳房精。馳月窟。警無聲。天馬來。翊紫幘。逸足騰。精魄變。天馬來。排帝閭。蹈且舞。黃頭郎。天馬來。不遑息。逝乘女。俯西極。

天門開

天門開。光煜燿。流紫壇。輝日壑。仰帝閭。橫斗杓。珠煥黃。相璫錯。皇駟騫騰。格澤回薄。歷次十二。畢會其絡。拂鉤陳。九旂翻。游極下。闢端門。圓靈躍乎金穴。義曜起於天根。火齊爲堦。玉砌垣。中有銀潢貫其藩。乘雲輶。駕鸞輶。裔裔詆詆。往若疑。神光灑蔚臚所知。如歷中垣。卽靈威。金薄華蟲。擢鈴綏。丹書綠字。天語奇。用褒姬德。錫乾儀。聿撫九有。萬億期。

后皇

后皇承宇。撫豫我人。萬彙咸若。帝握其鈞。烏弋黃支。羅縷而至。厥贄伊何。朱鷺白雉。

白蓮花歌

穀文小。盛蘭橈輕。璫瑤匣。淨天光平。池塘十里半楊柳。輕綃飛入芙蓉城。家在若耶溪裏住。還向清風懷白苧。碧煙消盡月爲魂。夢斷冰霜起寒素。中流何處吹參差。江北江南空暮思。就中疎韻誰特絕。一枝獨背斜陽時。洞庭帝子音塵闕。水盡天長澹將沒。吹殘翠黛弔明粧。滴盡紅珠剩香骨。誰倚歌聲蕩酒樽。秋

光鏡裏易黃昏。欲託微波寄情素。鴛鴦脈脈花無言。

平望道中

出郭星已闌。解纜潮將歇。燭滅蒲塘深。去棹何忽忽。宿酒破餘醒。西風吹殘月。乍別易懷人。欲寐屢搔髮。如何將客心。一棹雨絲白。

葑門放舟一夕抵嘉定

役役逐昏旦。泛泛親菰蒲。胥江滯春雨。少霽復長徂。漸覺客情淡。宛在脩竹餘。乘流玩浦溆。寂寞煙景晡。殘夢落何處。蓬角星疎疎。洲盡屢迴複。嚶城儼前途。及郭帆影落。曙色起林烏。

春日東懷王叔華

咫尺山河見而疎。游情空似馬相如。懷人夜雨搔雙鬢。孤館桃花到尺書。贈我明珠藏錦篋。知君歸夢在園蔬。芳洲擬送江南棹。更向春風問起居。

樊噲劍歌

距興化縣城南十里許。有噲墩。傳噲駐軍處。後穿渠得劍一。亦傳爲無陽侯物。父老言之甚悉。余爲作歌。

舞陽遺劍天下良。銘詞斷續久莫詳。敷敷喜聞故老說。犀渠鶴膝安足量。南郭隆鬱高阜。曾傳漢將屯軍處。使者穿渠不記年。掘得留犁力難舉。須臾熠煜神光流。紛紜繚繞杳莫求。精氣盤礴石爲裂。得勢躍看純鉤。股長三尺縱有理。中鋒剌剌鉞花紫。嚴飆倒激鳶鷗愁。橫倚霜郊萬人視。苔斑剝盡寒芒開。層

瀉入壘捐纖埃。芙蓉鏤碎白虹走。更鐙一角天河來。壯士拔鞘秋瑟瑟。欲掉其鋒詫無質。蚩尤爲匿古月魂。却向蛟胎呼不出。臘間剝蝕轉可捫。龍文蟲篆交網繡。當時斬敵幾千級。入地血澀沈沙痕。玉樞峻嶒銀鑿鑿。背上貪狼七星吐。豹髓淨膩蜚蜮堅。按金團絲蝕秋雨。河渠使者何堂堂。衆中起舞揮流黃。却命村官貯官府。到今不受私家藏。舞陽軍功一當十。殿上昂藏善爭執。從征曾諫留秦非。視疾何辭排闥入。勢親寵逼謔言張。黨呂滅戚豈衷腸。韓彭荏醢禍方烈。陷此讒鋒功誰償。此時利劍應在手。爲請先誅賊臣首。壯士鴻門請項心。併作孤光照牛斗。久同寶鼎沈河汾。魏文七劍徒紛紛。金精知已厭膏血。悔不早出從朱雲。

抵毗陵

川途日夕已忘疲。酒近毗陵醉更宜。久客情隨流水淡。思家人到晚秋時。孤村月露清鐘起。十里菰蒲一棹遲。欲向勾吳訪公子。江楓搖落閉空祠。

李道南

元氏縣云。李先生諱道南。字景山。號晴山。先生世由丹徒遷江都。富千貲。父敬修。光祿寺典簿。和而介。疏於持節。好施與。家遂貧。母早卒。無子。先生與兄雷。皆側室胡氏出。先生既孤。胡太孺人以女紅撫之。誨。冬衣裘。行者夜分猶聞讀書聲。學使者重之。有寒氣逼人之歎。學官吳鏡。李安溪高弟子。嘗偕客過其廬。以微言廢經義。恥爲華靡衣。常曰。文以勵行。若視爲科弟之階。未矣。故試庭不中式。貧益甚。然雖餓臥。不妄受一錢。乾隆己卯省試。以第八人貢禮部。幸卯會試。中式第二。榜初發。總裁及同考官知先生名。願早見。且招致之。先生不往。既殿試。賜同進士出身。始謁座師。是以名益重。總裁莊方耕閣學士。以東獨招先生。往論學。

術。相契愈深。明先生曰。子之學問人品。予知之矣。顧正貧。何以歸。予將命同人臚子。先生固辭。既而車馬至先生館舍。致臚者甚衆。先生知其意。概謝之。聞學士聞而歎曰。介至此乎。先生例選知縣。不赴選。設教鄉里。生徒數百人。元十七歲。執贊受業。嘗主泰州通州淮安府院講席。先生穎敏過人。而操行剛正。以古名儒自勵。對策剴切詳盡。事母孝。事兄悌。所著有四集說十二卷。太孺人將卒。執先生手曰。還是讀書。先生以是語名其堂。太孺人鍼黹數十平。遺斷鍼說隨。先生每撫之泣。海內通人名士。爲誄其事。先生錄爲斷鍼吟一卷。兄嘗亦善屬文。既沒。先生輯兄文。及先生文。爲同懷寸草錄四卷。乾隆五十二年。卒於家。年七十有六。子二元善。元善。

答荆刺史貽詩並示書院諸子

民生有三事。君親等於師。自問何所有。文行敢自欺。禮隆責亦重。將何以告之。念彼曠職者。厥官名曰尸。教學非無祿。爲政卽在茲。鵝湖經術治。白鹿統緒遺。仰慕古賢哲。何止百世規。而我未學子。抗顏擁臯比。章句雖略親。但拾毛與皮。清濁雖略辨。不過虛車辭。作人無實用。家國何所施。率爾當斯任。猶豫而狐疑。所恃愚且直。小大無敢私。勗之以忠孝。修德在樹基。戒之黜浮華。造道惡趨時。王伯厚先生謂後學去一時字。方可造道。廉恥尤所急。立志忍寒饑。庶幾閑大德。鸞鳳不化鴟。處爲子弟孝。出爲父母慈。敢云盡良士。良士亦有裨。持此謝知己。暫作他山資。若云久於此。此席非兒嬉。勉旃更勉旃。三復河干詩。

五十自述

五十父生我。我今復五十。生男只如此。顧影堪於邑。一解來日不苦短。去日不苦長。親亡始愛日。墓木悲蒼蒼。二解父願兒爲儒。母願兒爲儒。爲儒幾餓死。不及反哺鳥。三解葛衣母禦冬。溫被被亦朽。母沒兒衣

煖兒煖親知否。四解父書亦盈箱。母鍼亦盈篋。欲啓不敢啓。心病雙手招。五解一巢生數子。羣飛不竝集。有子戀舊巢。哀鳴亦何急。六解貧賤離親戚。妻子以爲友。再彈弦再絕。何以慰衰朽。七解舊巢旣已毀。何日營新巢。因貧轉藏拙。不使後人嘲。八解文章亦自知。得失操人手。敝帶享千金。聞者掩且走。九解却行那得前。妄行失故步。少小負師傅。老大悲歧路。十解高適晚工詩。伯厚晚篤學。古人非速化。功在果而確。十一解好學不厭老。鞭後補其初。屈指數甲子。可讀十年書。十二解

別梅

手植江南第一枝。半生心事有梅知。可憐似我清如許。誰更同君冷若斯。玉骨自應邀愛惜。吟情莫解慰離披。攀條欲別魂銷處。無計相留淚謝之。

羅兩峯^鳴爲寫別梅圖次前韻酬之

歸鳥從來戀故枝。多君寫出幾人知。生香不斷香如此。樂意相關意在斯。三絕高風擬獨賞。二難逸韻妙同披。謂羅南墅詩文章圖畫堪千古。若得黃金合鑄之。

自題小照

破屋三間自授書。日長天闊興何如。私憐老去無多力。偷得工夫學灌蔬。少年裘馬日輕肥。笑我臨風未奮飛。技痒媿無長袖舞。金門四謁已知非。

漸漸秋風老被欺。閒中歌笑倍淒其。人生各有傷懷處。不爲蘊鱸結遠思。
雅難入俗何曾雅。狂到容人不厭狂。識得廬山真面目。穠纖何必襲時裝。

看梅

照人顏色玉光寒。心似孤松氣似蘭。深夜月明人獨坐。此花須向靜中看。

喬椿齡字許西。祖籍山西襄陵。自前明來揚州。業鹺。遂占籍甘泉江都。魯循撫墓志銘云。先生沈酣六藝之精。涉

博士弟子員。歷試高等。輒廢未食。命之窮也。可勝感乎。篤于友朋。年四十餘。不督娶。不事生人產。性情高潔自好。故入樂與游。而復憚之。雖有放軼不羈之士。見之無不歎抑。年四十餘。不督娶。不事生人產。性情高潔自好。涉世深者。或以怪誕目之。儀徵閣學士阮元。幼嘗從之游。既貴。先生未嘗通一問。及視學山東。延先生佐文章。乃以乾隆癸丑十月往。明年三月。以疾卒於青州試館。閣學士遂樞歸揚州。於某月某日。其弟葬之於某地。禮也。循謹先生十年。時獲聞先生之論。將往山東。與語於泰州旅舍。自此遂不能見。越一年。循謹在青州。先生臥榻尚存。且雞酒黍飯。向榻而祭。時乙卯二月晦三鼓也。五月自山東歸。先生墓尚未有志。因爲之志。銘曰。半瞻彼齊城。驅馬宵征。月孤山冷。想見先生。元作小傳云。喬先生諱椿齡。字許西。甘泉人。性穎悟勤學。通諸經義。涉獵百家子史。尤深于易。撰著屢有驗。善屬文。以漢魏爲法。稱儒學生員。試輒高等。而未嘗食廩餼。自歛抑。不中試。先生性剛直廉介。跬步必以禮。交游皆擇正士。友有過。相規無隱。一時側隱之士。見先生皆深學山東。尹先生。冬十一月。相見於曲阜。衡量孔顏曾孟四氏子弟之文。講至聖林廟。觀禮器。先生欣然。歸若瀟志焉。明年春。至登州道病。返至青州。卒於試院。年四十三。野有古木。元戊之爲先生棺。歸葬揚州。

平山堂待月

山嫌歌吹俗。得月乃能幽。況在梅花底。堪爲半夜游。禪燈何冉冉。林鳥各啾啾。暢好開簾坐。同君一倚樓。

晚煙

江南暮色最銷魂。煙景濃時莫閉門。秋月漁舟楊柳岸。春風牛背杏花村。晚晴半入斜陽影。濕雨低迷遠樹痕。半抹山腰看不足。鐘聲何處又黃昏。

新燕

知爾營巢歲歲來。草堂如爲故人開。今年春色渾無主。莫向東風拂翅回。

贈鍾菽崖

萬卷詩書入眼空。茆廬蔬圃舊家風。疎狂我尙呼兄事。貧病人都歎道窮。筆陣酒兵旗鼓壯。荆花珠樹日星紅。世間冷淡應加耐。徑入繁華想不同。

試燈日坐雪齋中同鍾菽崖作

踏雪歌聲到。燒燈春色催。故人溫似玉。書屋冷於梅。虛白照千里。清寒伴一杯。暫須分月影。定不污塵埃。

將之山左留別諸同學

久別殊可惜。遠行何惻惻。抱書出門去。千里若同室。念我素心人。長少共肝膈。風雨孤病時。綢繆若膠漆。破屋兩三間。酣歌發金石。黃河催我渡。背聽江流急。掃雪登泰山。南望江南日。魚鴈拂雲來。如見齋頭筆。

柬王密臺

修竹何娟娟。綽有美人態。六韻想俱成。古賢與神會。我聞江南曲。玄鳳飛翻墜。逸興致爲佳。翰墨增藻繪。

披襟倘一來·商榷摩詞壘·

將之涉南舟·中別王榕臺

北渡黃河去·行瞻秦岱雲·年來譜作客·別後却思君·燕子閒春壘·丁香冷夕曛·齋前丁香一樹·常與同好諸君觴咏其下·燕巢之作·皆與

榕臺·蔽匡眉生聯吟者·

相期重翦燭·歸日細論文·

淮海英靈集

郝明龍 字雲蓀·江都人·明忠臣景春子·景春知房縣·死張賊之難·長子鳴鸞·從父死·明龍慟哭于戎壘中·扶喪歸葬·北走上其事·得卹廕·明龍念父兄慘死·絕意仕進·蔬布終身·年四十九·康熙時卒·

閒居

白雲片片著人衣·黃葉辭柯閒一飛·乘便小舸看釣去·偶來野徑得花歸·贏他雞肋早知棄·趁此蟹螯秋正肥·自是湖山堪久戀·不關城市與心違·

杜仁俊 字思曠·江都人·順治五年貢生·或云名仁傑·官蒼溪縣令·又江都甘泉二縣志·稱官寶坻縣令·寶坻屬直隸·蒼溪屬四川·絕不相及·豈仁俊始官於蜀·終於順天·故縣志從其終而事之歟·

重過法海山房

三年不到此·今到轉茫然·芳樹自春鳥·石橋空暮煙·好山雙屐外·古佛一燈前·默向蒲團坐·泠泠聽石泉·

江月

秋月兼霜白·空江向客圓·似能添水闊·只不欲人眠·心事今宵劇·關山此地偏·還家雖有夢·帆影隔長天·

王穀

字椒卻·號墨舟·江都人·順治七年歲貢生·官岐山縣知縣·

金陵懷古

連江烽火亂如麻·猶自笙歌擁麗華·絳蠟不知天已曙·鳳幃初起月將斜·詔催江令翻新曲·書止隋軍奏

暮笳千古君臣渾不悟。依然高唱後庭花。

箭插坪

峭壁垂千仞。攀蘿直到巔。秦山多礙日。蜀嶺欲低天。樹杪懸危棧。林腰咽斷泉。憑高一回眺。萬壑起蒼煙。

朱淑熹

字艾人。泰州人。順治辛卯舉人。

柳敬亭自京師過訪吳陵感舊

時出示予塔陳雁羣札子。

老病蕭條薊北回。還過海國感興衰。眼看出塞人長別。誰使孤城馬更來。白髮賓朋雙涕淚。黃蒿池館一樽罍。當筵休說開元事。何處昆明少劫灰。

李拔卿

字枚及。泰州人。順治八年拔貢生。官通判。

晚出南口城

黃沙撲面駭飛蓬。四月驚寒起朔風。南下地形趨督亢。西來山勢扼雲中。吹笳半壁城樓晚。牧馬荒陵草木空。卻答當年誰鎖鑰。北門終想寇萊公。

宣鎮

上谷崑然壯客遊。當年右臂繫神州。途經鶴嶺山如鑿。地近羊房草易秋。鹵簿昔聞從帝子。犬牙今復制諸侯。邊聲盡入西風厲。鼓角悲涼鎮朔樓。

徐

字○興化人。順
治十一年歲貢生。

隱居終養詩

昔人有遺訓。忠孝道難兼。高堂正垂白。忍忘鞠育恩。去去返故鄉。菽水追餘歡。一日勝三公。難爲達者言。捧檄雖可喜。迴馭豈徒然。毋爲競榮祿。潔養愧前賢。

鮑開宗

字又昭。
江都人。

重九喜晴次徐雨新韻

新霽欣重九。秋高望眼賒。西風憐皂帽。宿雨滯黃花。衰柳依平浦。寒潮落淺沙。茱萸釀酒熟。把酒惜年華。

熊敏

字遲度。又字顯生。江都人。居瓜州。順治乙酉舉人。究心理。
工詩古文詞。旁及書畫。終于宜興。所著有汲治堂集。

步竹園作

江月不受塵。江水不受俗。持我方寸心。濯此清冷玉。晚風過林簷。翠寒聲簌簌。烟光低映人。毛髮沁空綠。吟斷一園秋。暗籟自相續。夜冷露已溥。夢遶瀟湘曲。

熊維熊

字偉男。敏慧子。歲貢生。以文學知名。
所著有瓜渚貞烈志。綠雲軒詩集。

金山月夜同吳子方言家季亮武登黃鶴飛來處

隨月上高臺。江光一道開。數峰青欲斷。何處笛聲來。黃鶴遶孤塔。白雲橫古苔。洞扉閉玉几。定有列仙回。

閔

敘字鶴臞·江都人·順治戊子舉人·丁未進士·任廣西提學·

桂林寒月

天末此遙夜·云誰共素心·簾疎容霧入·樹老飽風侵·歸雁瞻斜漢·驚鳥過別林·旅懷殊未慣·腸斷此時砧·
輯廣西志略漫述十二律選一

捲甲曾聞捷似風·軍威久震百蠻中·祇緣債帥皆徵貨·頓使中涓獨總戎·經術籌邊推理學·權謀制勝奏膚功·呼庚誰復蒐軍實·挽粟飛芻特變通·

孫宗

字孝則·號虞橋·高郵人·順治丙戌舉人·丁亥進士·授中書科中書·學科事·本州專有優免馬差房差田差有以城工授官者·力持不可·堂官劉正宗·郎中宋牧民怒之·課孝則以索詐·下部面質·蒙宰議均得罪·上直宗彝·免之·獨坐牧民·調文選司·典試河南·轉稽勳司郎中·又補考功司·外陞蘄州分巡道勅使·以病歸·上直宗中水忠·孝則爲請賑·救活甚多·又建議周橋不可開·宜激淮水刷沙·河流之奠·終用其議·唯論治河之工·搜弊太露·觸怒河員·姦民乖隙誣以他事·遂下揚州府獄·總督于成龍知其冤·將昭雪之·會病死獄中·太守崔華傷之·以禮殮葬·州人哭者·編于道路·年七十二·所著有受日堂詩集四卷·易宗十二卷·圖說一卷·律數四卷·文集十二卷·

瑞雪頌

茫茫清句·波蕩塵飛·三靈改卜·九服同歸·辰星司籙·同雲應輝·天眷厥家·降穰孔祈·仁風扇臘·紛綸依微·白帝盛衛·鑒影振衣·三神羽化·五色鱗屏·飄蕭六出·粟瓦寒威·報我嘉歲·蝗遺種希·佳德萃禎·渥浹揚徽·瑤軫出御·祥飈被幃·王道清蹕·緹轂決圍·睿思劘咎·痾瘵已饑·觀風陳詩·顧省厥違·懷柔翼亮·皇德巍巍·

同曹秋岳先生遊韜光菴和高忠憲公韻

山水有真意。香林春景舒。佛宇起天半。恍臨洪濛初。流泉停芳池。清風灑前除。遂使冰雪心。迴與塵世疎。臨軒欄江海。一氣浮清虛。層雲排闥闥。飄渺仙人居。

庚申湖泛。城市水深數尺。浮屍滿村落。閉幕撫軍發金爲擇地結茅。且致予書。俾未死者得所。因命安兒構篷近萬閒。入冬飢寒交迫。予過吳門請賑。舟行遇雪。述此。

兩日江上船。一夜天邊雪。朔風裹薄衾。依舷抱寒鐵。嗟彼篷中人。竈冷炊烟絕。家家哭無聲。淚凍寒哽咽。頃刻棄溝渠。此苦甚漂沒。當世多仁人。哀矜能勿切。事幸達九閭。恩庇災黎骨。

孫弓安

字無燁。高郵人。宗彝長子。順治丁酉舉人。以子獲孫貴。贈奉直大夫。康熙庚申歲。大水入城。弓安董築南關。露宿者數晝夜。城中得無恙。又倡富民輸粟。以周窮乏。學宮壞。偕同志鳩輯。生平喜遊。工集唐詩。

有遊草。所至皆。

司寇喻武功先生督修淮陽河道。遇余於江都謝埭。題詩於畫見遺。有移向汨羅深處住之句。集唐誌感。

聖主宵衣夜未央。遙憐澤國水爲鄉。苦心欲得安民術。元首忻從治世方。異地六時勞寤寐。清淮千里共汪洋。殘鮮幾戶蒼生在。猶爲君王泣數行。

司馬禮

姚合

劉翥

李益

李山甫

臣心自愛玉爲人。善政多才寵寇恂。奉命但如頻作客。在官猶自未嫌貧。一錢不受歌劉寵。千里同聲說季真。召對應陳桑土計。更因從此展經綸。

黃酒 錢起 李訥 朱慶餘
張謂 包何 耿緯 張籍

高絃一弄武陵深。誰和騶虞發素琴。十載空餘孤竹淚。中年潛識子房心。身隨幻境緣多事。話到傷心只苦吟。四海千秋誰著眼。纓桐焦尾間知音。

胡宿 諫用之 鮑君徽 許渾
潘江 李羣玉 郎士元 李登

憐余白髮老僧多。雲樹連天阻笑歌。詩繼青蓮懷謝史。碑評黃絹讀曹娥。千秋孤憤芳時在。南國浮雲水上過。忽漫相逢還惜別。故人重見詠菁莪。

湯說 張謂 翁綬 杜牧
李諫 崔峒 蘇頌 李涉

題楊社益照

清如冰玉重如山。感會多生氣概閒。獨向清溪依樹下。但留白眼看人閒。我生隨處堪爲樂。誰道皇天不惜閒。檻水每從千澗落。朝看飛鳥暮飛還。

薛能 劉長卿 雍陶 曹松
李融 鄭谷 張說 李頻

歲月雖多却少年。僻居雅愛近林泉。伊人宛在流秦水。司馬猶存諭蜀箋。滿砌荆花鋪紫毯。點溪荷葉疊

青錢知君不戀南枝久。時論同歸尺五天。

劉威 談用之 黃滔 薛逢
白居易 杜甫 陸龜蒙 杜甫

王嬾雲遊吳門絨書索題冊子

古來名下豈虛爲。盡日含毫有所思。疎影橫斜水清淺。寒光凝沍玉參差。詩成自號新開府。酒後常稱老

畫師。千里雲山何處好。慚無佳句寄書遲。

張祐 薛能 林逋 劉文房
羅虬 杜甫 杜牧 盧僊

江南江北共悠悠。君去春山誰共遊。客裏幾時攜素手。人閒亦自有丹邱。閒臨筆墨塗溪壑。醉折花枝當

酒籌。知是清才推社伯。更憑飛夢到瀛州。

許渾 劉商 劉文房 韓炳
曹松 白居易 盧僊 胡寅

輯唐顏許太史視學江南

玉尺程材積艾蕭。斯文興起屬天朝。恩留雨露隨時渟。身出山河應數饒。照徹燃犀澄徹水。清如寒玉直

如條。書懸魏闕奎光聚。常見台星在碧霄。

李渾 郎士元 翁綬 王建
盧鴻 耿煒 竇冀 盧壁

爲征茅茹慨同升。未盡風流相國能。虛受海王原浩浩。休容山節自稜稜。青雲足下三千士。白玉壺中一

片冰盛德好將銀管述。半家寒骨起清臄。

徐林 紹 杜甫 荆聖偉 芮挺章 韓定辭 李洞

鼎呂威儀蓋代瞻。禮延羣客每謙謙。將羅鴻羽堪爲用。特鼓龍雷奮起潛。箕宿舊勞天子夢。奎文新應史

官占。望崇早歲歸黃閣。師相尊銜日與兼。

任華 殷文珪 崔頌 崔塗 李頎 祖詠 羅隱 劉兼

左郡伯芝齋詩

人識傳呼解豸儀。暫分銅虎別京師。九重聖主方虛席。三事賢臣半進規。宣室久懷霖雨夢。國人先咏袞

衣詩。政成何用三年滿。出入承明啜紫芝。

盧綸 薛逢 章莊 崔濕 張翥 劉禹錫 方干 江爲

琅章朱紱映金羈。遙望長如玉樹枝。閨苑芙蓉輝寶籙。隋堤楊柳拂旌旗。化行淮甸春初遍。恩入河源凍

合遲。萬象曉歸仁壽域。洞中天地產靈芝。

錢起 張籍 李義 王彥威 趙彥昭 杜牧 溫庭筠 曹唐

喜得君侯妙撫綏。迎春草木長芳枝。銜恩暫遣分龍節。清宴還如集鳳池。落月低軒窺燭盡。澄泉繞石泛

觴遲。冰壺一片照亭上。感會羣仙把玉芝。

張煥 楊巨源 李涪 劉延
李白 方干 王諲 薛濤

爲政風流今在茲。清如寒玉直如絲。花驄節概烏臺上。龍馬精神海鶴姿。四野九秋登百寶。三年五度換雙輝。萬家鹽井烟雲護。應亦年年稅採芝。

杜甫 歌 張籍 平 曾 陸龜蒙

孫弓聖 字無同。號隅庵。高郵人。宗弟次子。少負雋才。爲文操筆立就。嘗南遊湘粵。北歷燕齊。至必見諸詩歌。其言凄清峭刻。宋中丞輩。謂有盛唐遺響。著寄嘯草。呻吟雜詠。不盡意編。

大觀樓晚眺

望中千里碧。春水接遙天。風靜浪無勢。江清月正圓。晚潮連石動。漁火雜星懸。森森思何極。歸船獨扣舷。

孫逖 字遵人。號沛邨。高郵人。弓安子。八歲能文。十三歲遊庠。有神童之目。宗弟訟繫常獄。逖孫以幼。年六十始與其子中。同舉癸卯鄉科。已酉歷內閣試。世宗憲皇帝。特命以中書管司經局正字。庚戌。督京右翼太平倉。

甲寅。引見。奏議停裁留漕糧之例。以充天庾。復請禁店主赴倉領米。以裕兵丁。悉蒙俞旨准行。尋陞刑部浙江司主事。監糶西城米廠。自於大司農。鐵星史公。遞減價直。所濟貧民無數。時淮揚疊被水災。皇上軫念災民。下詢廷臣。逖疏陳河道源流變遷形勢。前後近數千言。因議開毛城絀引河事。挂吏議。復蒙聖恩寬宥。供職如常。國編。古賦選。唐賦選。有檉弓論文。華文選行世。

廣德道中留寄太守丁桂濤

春雨乘吳舫。晴光上越車。野梅欹湖老。亂石疊溪斜。細載盈驢背。提封控犬牙。川原淳朴意。處處有桑麻。

孫中 字葵田。號靖堂。高郵人。逖孫子。性嚴謹。雖暑暑必衣冠端坐。曰。正心修身之道在是。白田王予中深器中之。因以女字焉。與父逖孫同舉癸卯鄉科。卒年二十有七。子全。輟已卯經魁。全敵。已卯解元。轉其詩。

爲靖堂
存藥

蟋蟀

立秋今幾日。蟋蟀已微吟。咽雨依殘砌。和風怯暮砧。家無刀尺響。爾有歲寒心。露冷空齋外。蒼苔一逕陰。

孫

穀字雨田。一字祈園。高郵人。獲孫子。舉良方正。試用補江西南康令。下車革船差馬差諸弊政。省獄出無辜罪者三十人。潔廉孤直。不愧祖風。署贛州府知。除清弊之不便於民者刊于石。上官忌之。誣以他事落職。撫軍岳公廉得實。保題于朝。復原職。病歸卒於家。年四十六。著長嘯齋詩集一卷。

丙午十月望午睡夢登高山有紅石可愛山旁童子持石贈余爲硯喜而賦詩

硯山清夢到。奇石手摩挲。霞鍊朱生采。香凹墨是窩。方圓真一品。得失試三磨。爲問江淹筆。持來比若何。

孫同郊

字雨疏。號潮公。高郵人。穀長子。著有長嘯齋集一卷。

遊愛日園舊址。敬步高祖吏部公愛日園詩原韻。

往蹟依稀一望中。疏林猶帶落霞紅。幾株楊柳橋邊合。四面芙渠檻外通。瘞鶴至今留片土。舊有瘞鶴臺。啼鳥

何處認衰桐。

先吏部公沒後園遂廢去。

遺編剩有歸田錄。讀罷遙思綠野風。

孫同庶

字一鶴。號培莊。高郵人。穀少子。廩生。負奇氣。能巨飲。詩有唐音。著飛桂軒文集。詩集。瓶室詩餘若干卷。

樓莊。去西湖六十里曰太陽溝。溝西二里許曰樓莊。先餘部公築也。溝之南北皆田。莊居其中。土人呼爲孫家樓莊者是也。癸未八月。與四兄信宿其上。低徊不能去云。

日落湖光微灩明。家家社鼓到三更。既知歧路亡羊泣。好傍先疇買犢耕。鋤去新梁夫媚婦。沽來濁酒弟

酬兄莫言五世澤常斬努力還期保令名

從 準 號西村高郵人

賈基

兩奩玉子對文楸一局千金若個酬花下客誰談別墅橘中叟自賭瀛洲機心豈必逢場用勝著何妨爲劫留只是仙人棋莫看爛柯歸去卽荒邱

劉長發

字存永江都人康熙癸卯舉人丁未進士授中書舍人遷虞衡司主事甲子典試廣東嘗論免國學仙霞解炮之役生平規矩自範里中和篤行君子詩甚工惜不多見

題董宗伯山水障子歌

先生文章之宗匠早歲致身躋卿相藝苑聲華各擅奇風流一代爭矜尙當年筆墨更稱神北苑南宮備一人興至經營拂絹素寫山寫水得其真一時聲價連城重貴戚權門相傾動只今眞贋半雲閒還借高名轉馳送藏來此幅勢氤氳衆峰突兀滿烟雲紛披草樹翠可摘山容直欲凌蒼雲懸之一室當臥遊水光山色驚涼秋有時霏霧初濕風雨疑從壁上流淙淙寒玉泉聲碎石屋亭亭倚山背嵐光照日瀉晴空清簾疎簾交掩映先生盛名在臺閣更從筆底窮邱壑安得誅茅結屋於此閒策杖看山獨往還

賈良璧

字子瑜高郵人康熙癸卯舉人

渡彭蠡

湖勢雄南紀。揚波擊畫舲。亂山圍巨浸。初日盪層溟。戰血千年碧。愁絲兩鬢青。浮沈真若寄。滄海一流萍。

眞州夜泊

橫櫂大江濤。孤城起夕陰。石帆殘照迴。瓜步晚烟深。潮雜舟人語。鐘清客子心。呼燈還貰酒。莫遣鬢毛侵。

江

字辰六。江都人。康熙癸卯。占籍貴州中式。榜姓越。官解州知州。著有河汾集。常以曲江濤榜其齋閣。又什廣陰曲江詠。以辨竹垞之誤。

喜吳天章至自蒲坂

久遠冰雪後。相對兩蕭然。有榻留徐穉。無錢與鄭虔。銜杯重話舊。剪燭欲忘眠。不識千秋後。詩篇若箇傳。

雨後舟中

一幅春山畫不如。夜深燈火對村居。布帆十日風兼雨。喜得餘閒讀漢書。

張丕揚

字北溟。號木田。秦興人。與江都殷彥來。顧書宣交。王新城序其詩。以爲金石之聲。芳蘭之韻。非擬拾其廢劍南可比。著木田詩鈔八卷。

題魁字

明倫堂中屏。尚有魁字。爲宋文信國書。

斂蓄魁光八十年。欣看今日麗中天。文星高映峨嵋月。元氣潛分濯錦川。鐵畫銀鉤寧漫漶。龍跳虎臥自騰蹇。遙遙精意相呵護。珍重當年筆似椽。

王訪

字警郁。與汪長齋相友善。著敬餘堂詩鈔二卷。

春日偕吳教諭叔子集羅漢寺

同人尋逸趣，聯步石橋西。徑轉花爭發，林深鳥亂啼。重巒斜景徧，十寺梵音齊。坐久塵心滌，烟嵐入座低。共發濠梁興，相攜到茂林。溪停孤塔影，山壓半城陰。瀑水沾松翠，茶煙入竹深。歸途殊未遠，新月出遙岑。

吳能謙字自牧，號受亭，儀徵人。著有春風第一亭詩略一卷。

題山巢圖即康山舊址。

市上儼村墟，康公舊草廬。無人窺遠抱，有客愛幽居。江水環空郭，晴嵐隔小渠。銜泥雙燕子，慎勿污琴書。

許天球字翁葵，江都人。師六編修從孫。著碧雨山房詩鈔一卷。

端陽後五日，讌集補堂。聽通州王吉途坦彈琴，卽題所著琴旨後。琴旨已收入四庫全書。

雅音欣閒作，傾耳最心降。夜迴林猿嘯，風清石澗淙。奇書人不識，妙指世無雙。何況消長夏，吟儕倚竹窗。

同吳蕞堃過枝上村，登彈指閣，觀文思上人所藏黃瘦瓢書卷。

歲月悠悠只指彈，振衣百尺倚闌干。翠環傑閣千林迴，風壓層簷四月寒。舍影分僧毫際築，詩濤湧客卷中觀。卽今韻事追靈運，雨到何妨罄夕歡。

張紹良字又房，泰州人。

京口曉發

渡口月初落，城頭鼓角鳴。人家明宿火，行李帶殘星。野店江光白，山程草色青。南徐頻作客，歸夢幾時醒。

張

鈿 字環齋，
儀徵人。

爲黃天儀題其祖翁南升先生手蹟。

涪翁詩調自清奇，一語令人十日思。片楮文孫珍惜甚，江西家法少陵詩。

蘇同許

字友燕，號補
廬，高郵人。

渡揚子江

春潮乘早渡，烟影一江生。雲勢連山起，濤聲到海平。遙鄰芳草路，直接潤州城。點檢登臨興，先從北固行。

送客之吳門

客路秋光泛綠蒲，君從畫裏到姑蘇。楓橋細雨山塘月，一夜懷人夢酒壚。

陳時清

字老香，
泰州人。

天印山詠古

天印山南王氣新，下臨淮水石磷磷。赭衣空費三千力，地脉何曾更屬秦。

汪惟豫

字次倫，一字琴
嘯，江都人。

鷺

白鷺偶相見，閒閒到柳塘。淡宜參水月，孤影避鴛鴦。

方肇範字引諧·一字晚鋤·江都人·著有晚鋤詩集·

歸舟聞度曲

西風吹欲斷·涼月耿疎林·此夕移歸棹·蒼茫烟景深·誰家歌水調·長笛起商音·縹緲流清怨·空江何處尋·

吳賦書字岐章·儀徵人·

南塘新居

城居大半似江鄉·貼水初聞蓮葉香·老去生涯何所事·一竿晴雨釣南塘·

徐維祺字瑞周·江都人·著豫堂詩集一卷·

清明日送弟

漠漠寒烟帶曉溟·一行斷雁短長亭·莫因佳節傷離別·芳草垂楊到處青·

文二訓字命時·儀徵廬生·居甘泉之堰橋·自稱與可後人·畫蘭竹自成一派·子九皋·字秋翎·

村中卽事

一灣碧水護邨居·況是清明二月初·老樹青時人撥甕·小梅落後客翻書·時巡花圃培新土·爲愛苔烟摘嫩蔬·此是冲虛經妙處·何勞更夢入華胥·

陳儼字以莊·甘泉歲貢生·居北鄉黃珏橋·幼學負販·久而馳之·偏讀經史·深于宋儒理學·時郭述堂館于北湖·

一卷

題房孝子墓碣後

大孝本庸德，苟難非所矜。聖人未可學，流俗只愛身。不與睹奇行，曷以激天真。房君農家子，幼事牧與耕。愚不讀詩書，朴不愛聲名。炯炯一腔內，但知父母恩。親在與俱活，親亡不獨生。一割動天地，先以母病，割股，再割泣鬼神。繼以父病，割肝，忍痛從父役，臥創趨母噴。卒亦歸全受，豈虞佑竊冥。孝子仆于田，扶歸裏間，臥數日，後自愈，數年後以病歿。至此其他寧具陳，彬彬衣冠侶。熙熙草塋氓，孰無毛裏愛。孰無孺慕情，孰能承厥志。孰能養厥躬，隨分盡可勉。所難葆赤心，房君何如者。思之淚盈巾，惜哉自毀傷。不得邀恩綸，予爲請錄葬。愧慕有餘忱，書茲表墓碣。千載感行人。

謝

旭字東寅，江都諸生，居北鄉之黃莊橋，與吳秩三寅爲詩友，著遺閒偶集一卷。

廿四橋望月

西城高處夕陽紅，隱見樓臺倚碧空。金柳層層搖夜月，玉簫隱隱遞秋風。橋餘斷石雷塘路，人過寒烟帝子宮。多少繁華徒轉眼，不堪翹首暮雲中。

焦氏別業

曲水環深宅，春來致更幽。花光侵客袂，翠影落茶甌。談劍能驚座，敲詩豁倦眸。只因良會少，欲別又淹留。

方願瑛

字符白。一字石村。安徽歙縣人。寄籍江都。初守河南懷慶。有政聲。懷人呼爲白面包公。陞江西贛南道。以內艱歸。服闋。補廣東惠潮道。值潮州大饑。連開倉救荒。世宗憲皇帝優詔褒之。且下其法于他州。陞廣東按察使。以事繫獄。乾隆元年。起爲雲南迤西道。卒。著有石村詩藥一卷。

荒院

荒院無人到。經句草又齊。佛燈沈雨暗。鬼火入秋低。拋食爭朝雀。謀炊及午雞。棹聲來復去。直在短牆西。

杜

銘字融西。號適門。甘泉諸生。居湖濱之杜村。鄉黨稱爲篤行。著潭北莊詩集四卷。五言如風向樹邊得。春從雲。綠窗時聽三更雨。黃卷常消半夜燈。摘牽蘆架豆花紫。高掌鸞塘蓮葉青。亦佳句也。

暮春卽事

門掩垂楊路。春歸換物華。矮簾延近綠。隙地補殘花。風細留香住。苔深蔭日斜。閒中撩午夢。啼鳥隔窗紗。

春遊近郊

洗雨山容靜。含烟樹色迷。草侵村路仄。水益野橋低。蝶夢依花短。雞聲到午齊。放閒何所忌。樽酒自提攜。

劉國猷

字禹美。號後齋。寶應人。康熙壬戌進士。官鴻臚寺卿。著有碧梧翠竹山房詩鈔。吳江潘稼堂采。爲墓誌云。猷。復以女妻君。君年二十五。世爲寶應望族。考士壯。贈通政司左參議。母喬氏。侍讀石林。其舅也。侍讀愛君穎。又明年。典試粵西。未復命。丁貽公艱。服除。補戶科都給事中。居六年。擢通政司參議。又四年。歷督捕理事官。改鴻臚寺卿。以疾卒官。年四十八。美在戶科。嘗建言民開田畝。有大地小地上中下地之殊。起科輸稅。或二三畝當一畝。或七八畝當一畝。蓋土有美惡高下。田有寬狹肥磽。自古則壤成賦。不能強之使同也。今賦役全書所載。或田少而賦重。或田多而賦輕。即以揚郡言之。高郵田二萬五千餘頃。額徵銀四萬一千餘兩。泰州田九千餘頃。徵銀四萬四千餘兩。興化田二萬四千餘頃。徵銀二萬八千餘兩。寶應田二千餘頃。徵銀二萬餘兩。非泰州

寶應之田。視高郵興化少至三倍十倍。而賦重至三倍十倍也。泰州寶應乃大地。而高郵興化乃小地也。小地則一畝爲一畝。故賦輕。大地則數畝折一畝。故賦重。而全書不明言其故。吏胥緣以爲姦。愚民以小畝而輸大畝之賦者有之。恐異日有借言清丈。欲以一畝作數畝。民何以堪。請教纂修簡明全書諸臣。將天下田畝等則。詳類折數。具報書中。以垂永久。上是其言。上有建議。請丈量准摺田畝。以奏地入官。屬之者。君歸出乃賤。其在刑科。則當秋審朝審時。取各首所上發書。反覆詳閱。可於必爲平反。其在督撫。則詳考則例刊布之。俾官民通曉。往時以一逃人爲抵。連累至百十人。及以逃案爲市。取所歷州縣官職名待劾者。弊不勝詰。皆剔除之。由是督捕事倚案。廢闕稀。部議乃裁其官。併歸兵部。而改君鴻臚。凡此皆君政績之可紀者。君性寬和。立心行事。一切依於厚。自未第時。已能存濟諸親鄰。既得縣。疎戚貧宗。無不收卹。與人交。始終若一。折節寒素。未嘗以貴驕人。稱人之長。習人之短。如弗及。雖早途。不懈於學。刻苦爲詩章。有集若干卷。

送吳楞香祭酒予假省親卽東同門諸子

汝夔教胄帝命諄。周禮典樂司成均。明倫講藝羅俊彥。古來師氏難其人。天子崇文慎茲選。聰明威重遜儒臣。太學相沿傳故事。破除積習規模新。憐才一心失貞白。寒門下士無沈淪。園橋濟濟見填咽。珊瑚網底收奇珍。韓愈文章仰山斗。鄭覃聲望兼絲綸。胡爲故園動歸興。一朝解珮辭楓宸。黃山白岳瞻子舍。入告臣有高堂親。平生所學重根本。陶冶六藝歸人倫。如斯制行礪末俗。直欲表率先吾身。我慚荒落親哲匠。時抱疑義相咨詢。每看戶外絕請謁。不似馳蓋紛車輪。憶昔程門數兄弟。幾年落落星疎晨。但有嗣宗趨柏府。謂阮子子將猶滯江淮濱。謂許時昨者隴西公子至。謂嘉玉蒙陰臨邑來張陳。謂張禮山含香次第上丹陛。製錦尙待紀與辛。謂辛祇傳亭故人方來君獨去。一樽別酒愁城闌。人生聚散偶然耳。家庭至樂由天真。小人有母闕侍養。朝朝黃闕空逡巡。送君不獨感離索。東門悵望飛紅塵。

立春後一日和王方若川東坡韻

晚風料峭雪欲晴。黑雲脫壤奔遙夜。客來小閣簾乍褰。坐對寒蟾掠簷下。淒清天宇眼倍明。香發春醅恣傾瀉。星搖火樹花競飛。欄壓酒人樓半亞。燈市百枝買須夥。羲和一鞭去不借。今朝東而忽受風。昨日窮陰已告謝。換歲難追竹馬年。安心且閉蝸牛舍。世味嗟誰薄如穀。佳境從人甘似蔗。次公醉後任底狂。坡老醒來無可怕。常筵快讀元旦詩。嬉笑不妨兼怒罵。

劉師向

字封事。號蒲塘。寶應人。國賊長子。康熙辛卯經魁。知四川江津縣。廉能有治行。內陞員外郎。未赴卒。著有蒲塘詩文集。

秋夜渡揚子江

浩淼清秋夜。金焦相向明。亂帆揚子渡。遠火潤州城。風定鈴無語。江流月有聲。遙知香海內。大地總浮生。

和陶子師贈別韻

風吹江岸雨絲絲。送客言隨沈鍊師。爲到紅亭賒酒處。能忘明月下山時。雲生古道行人失。鳥帶斜陽去馬遲。握手臨歧懷舊雨。西窗剪燭與君期。

劉師

字秘書。號艾堂。寶應人。國賊次子。少受業于方望溪。爲文有法度。康熙庚辰進士。以庶吉士改檢討。通政使。兼吏部左侍郎。兼署順天府尹。授都察院左副都御史。順天主考。授工部右侍郎。轉禮部右侍郎。協理直隸總督事。進吏部右侍郎。改內閣學士。兼禮部侍郎。充福建觀風整俗使。告病回籍調理。因事被議。恩予翰林院侍讀學士。以乾隆丙子年五月十五日卒。年七十九歲。黔甯降在萬山中。苗蠻雜居。俗靡悍易叛。時巡撫淮部丈量陞科之檄。議欲奉行。公謂清丈必擾民。俟有訟田土者。飭流土官行之。令較便。民苦鹽少。請中釐定之令。

公曰：價定則愈昂，且聽之。惟禁私販而已。由是價頓平。陸見時世宗憲皇帝，問孰可勝提督任者，以南龍總兵蔡成貴對。時蔡方密疏劾公，而公願力薦之，直紉永定河決。蘇州豐渚等處露行賑卹之，屯莊頭人凌虐貧民，捕治之，奏効前督李紱。倉穀交代不清，奉批云：覽奏朕正喜悅，內外大臣若能如此來公，不數年天下吏治肅清，社稷蒼生蒙福矣。閩自朱一貴平後，偷渡一事尚爲害，福興漳泉居民食粟地肥饒，冀可獲厚利，每聽巨奸引誘包攬，名曰客頭，人各釀金，集至百人，裝載開洋，多於海中沈溺，甚至過沙洲荒島，詭云到臺，呼客上岸，委之而去。公奏請包攬偷渡者，擬軍中途中謀殺，照強盜傷人得財律重辟，其風頓息。臺灣番衆作亂，公虛奸人與通，獲通番千總正法，然後川兵進剿，諸番奔竄悉平。他若禁止火葬，悔婚婦女，聚衆械鬪，服毒圖賴之類甚多。六年，刑政清肅，卒以積勞成疾，請假歸里。乾隆七年，兩江總督宗室德沛，參奏劉師恕族弟生員劉潤，主使城民，鬧堂鬧賑，論曰：劉師恕族人，肆無忌憚，伊實難辭，不能約束之咎。交部議革職。十六年南巡，賜侍講學士銜，著有賜製堂詩集九卷，續集一卷。

由獲鹿入山過井陘五十餘里石徑窈窕民俗淳古可愛

好山不遽來，小小先點逗。道路初坡陀，沙礫相雜糅。百里漸西轉，羣峯忽東首。抱城走回環，破雲聳孤瘦。崎嶇策馬前，合沓如我就。曲曲入幽深，層層出奇秀。一綫折潺湲，千丈落颺颺。懸崖瞰將壓，怪石怒欲鬪。高盤若飛翔，低赴似馳驟。終年苔蝕皴，萬古風吹皺。分日餘光照，仰天一痕覆。蒙翳失徒侶，逼仄窘邂逅。不惜登涉勞，喜挾蘊蓄富。歷險知晉強，遺俗覺唐厚。畜牧輕虎狼，人居慣巖竇。簡古羲皇上，憂思蟋蟀後。細雨過松楸，寒烟表節候。蠻榼上青塚，蹇驢控紅袖。幾朵竹籬花，數聲麥壠雉。解鞍憩茅檐，閒步循翠岫。採風徧邨落，執禮兼老幼。日落數雞犬，火出迎耕耨。斯民自淳朴，吾徒或紕繆。欲滌塵垢心，一掬山泉漱。

過靈石喜晤陸昂于同年

浮山常入夢，琴上響泠泠。何意過汾水，相逢此驛亭。羣峯涵潤碧，高柳抱城青。瀟洒春風裏，征車半日停。

仙霞嶺

嵯峨當驛路，顛倒憩禪門。冠蓋閱人速，雲山托佛尊。誰知松品秩，但見竹兒孫。老病重過日，行旌帶雨昏。

弔總制范公

一劍酬恩易，三年繫獄難。畫煤據義憤，獄中作詩以煤代筆。擊械見忠肝。逆撫劉秉政求見，公以鐵械擊之曰：吾恨少釋耳。氣阻閭雲暗，魂依

海月寒。田橫多死士，腸斷白衣冠。

劉師寵字越清，號榆莊，寶應人。師恕胞弟。貢生。任直隸州州同。終清河縣主簿。著有天山草堂詩藥一卷。

病瘧

咄爾顚頤之子頑，且癡。坐使炎帝百草無由施。寒如令我裸袒抱冰雪，熱若置我釜飢加蒸炊。昧我蚩尤五里之毒霧，震我朱亥百斤之神椎。爾徒索食得幾許，胡乃恣意百所爲。詛神罵鬼出下策，投軀委命憑庸醫。杜陵糟粕烏能相唬嚇，子璋燭髓赤血空淋漓。或恐百年如夢倏忽盡，假而五日不汗吁可悲。古來有人曾哭老聃死，世閒無竹可替長房尸。我命在天不可奪，死何如生焉敢知。門前荷花萬朵爛如錦，火急盪船買酒澆新詩。

登大觀樓

我來釀酒弔羣雄，目送茫茫逝水東。天塹魚龍回蕩瀾，神山金碧寫虛空。雲垂海國千帆雨，日落江樓一

簫風淺渚不波舟不繫。故應多讓狎鷗翁。

由玉泉寺至靈隱道中小憩

小奚背負綠玉杖。瘦翁自跨烏皮鞵。葑田涼蛤吠白水。松寺蒲牢鳴翠烟。晴驚雲瀑破山出。天落虹梁絕

澗懸。汲僧弛擔楓根坐。借與木瓶嘗野泉。

劉冠苟字穎川。寶應人。師向子。年十三。以雁字詩見賞於學使者。補博士弟子員。十五食餼。善作文。工楷法。尤善雙鉤。性孝友。父卒江津。聞訃。數千里匍匐奔喪。奉櫬歸葬。以哀毀嘔血致死。年甫三十。鄉里感慕。

無不歎惋。著有翠蔭園詩鈔。

登文筆峯南望有懷

山到最高處。登臨獨悵然。葉黃秋滿地。雁白露橫天。世事浮雲外。鄉心落照前。何當逐帆影。飛渡海西邊。

劉傳馨本名啓。字最魯。號旅齋。寶應人。師恕次子。以貢生授詹事府主簿。工書畫。著有隸辯。歷代畫譜宗派說。愛蓮居士詩。

稼同樓晚眺同筠榭

落日下平楚。高樓納遠風。人來飛鳥外。秋老稻花中。萍梗家何在。田園計又空。悲歡無限事。茲意與君同。

劉仰桂字東麓。號象林。寶應人。師龍子。郡學廩生。居栢溪二十年。著有真意堂吟草一卷。

由下天竺至上天竺

路入三天竺。禪林貝葉薰。香花千塔共。鐘磬四山分。佛屋依丹嶂。僧房臥白雲。欲尋溪盡處。空翠落氤氳。

劉天麟 字仁趾，號青嶼，寶應人，師龍孫，內閣中書方長子，終於諸生，著有青嶼詩集一卷。

述舊示二女

瑟瑟淒風吹，暮雨打窗紙。寂寂孤燈下，骨肉我共爾。爾父作楚遊，何時返鄉里。家貧乏僮僕，應門惟老婢。幾番驚剝啄，不見來雙鯉。往事不堪追，一如在邇。失怙我八齡，吾弟六齡耳。祖母誠吾母，存孤良勝死。我母閱艱辛，四十年於此。年饑籌養姑，肥甘資十指。漏下課兒書，勤惰爲悲喜。姑歿哀禮全，賢聲流桑梓。逮後昏嫁成，老母漸衰齒。更憐爾母亡，撫爾不離咫。爾父館郡城，授餐聊適彼。前年歸老屋，團圓招爾姊。爾父雖出門，不日可榮仕。未幾爾姊歿，爾母悲無已。高堂憐病婦，命爾日看視。客夏爾父回，幸得一官美。卜吉挂江帆，舉室歡迎祉。昊天何不弔，忽降青鸞使。爾母逝從姑，地下侍寢起。荏苒秋復春，流光去如駛。夜深江上寒，念我同懷子。

劉

伶 字槐叟，號偃仙，寶應人，冠菊子，郡增生，著有期山詩文集。

踏春詞

曉春烟柳正纖纖，舞傍紅樓壓翠簷。好是賣花聲過處，玉人親自捲珠簾。

劉履恂

字迦九，號曼卿，寶應人，乾隆丙午舉人，授國子監典籍，卒於京邸。

贈喬暄亭

秋風翳陽景。流水迴且深。之子不諧俗。結廬南山岑。茅茨隱叢篠。石上橫素琴。木葉落空澗。涼颼吹衣襟。興至一再彈。詎言無知音。

棲霞寺

杖策尋初地。欣然慰所思。烟深紫峯閣。秋老白雲祠。曲磴僧歸晚。高巖月上遲。松風漾清聲。趺坐渾忘疲。

荀卿

祭酒無端欲救時。去齊奔楚果何裨。功名進退隨黃歇。學術源流悞李斯。千載蘭陵徒作宰。萬言金匱詎堪師。著書枉比三騶子。難與鄒人傳竝垂。

劉兆彭

字述民。號野塘。寶應廬生。著有拳石山房集。

打魚詞

朝打魚。長湖去。暮打魚。長湖住。去住長湖年復年。生涯惟賴打魚錢。打魚湖上多風雨。扁舟來往不言苦。西風剪剪雨絲絲。一笠一蓑知不知。漁翁少小慣打魚。水如平地船如車。但願賣魚買得酒。蘆花醉臥長蘧蘧。網集澄湖漾清泚。萬頃琉璃收不起。少婦停橈向晚炊。烟光散入蒹葭飛。夕陽杳杳隨波沒。十里露華香未歇。何處鳴榔夜半歸。櫓聲搖碎湖中月。

程文蔚

字豹南。一字牖村。江都人。康熙甲子副榜貢生。修文縣知縣。

渡河

袁浦開帆水正平。南風五兩渡河輕。波分鮫室鍾吾驛。樹繞龍亭下相城。落日向人低薄暮。浮雲隨我滯孤征。心驚桐柏交流處。不見長淮到海清。

